

ԸՆԴՀԱՆՈՒՐ ՏԵՂԵԿՈՒԹՅՈՒՆՆԵՐ

ԲՆԱԿԱՆ ՍԱՀՄԱՆՆԵՐԸ: Դերսիմը ոչ նահանգ է և ոչ էլ սահմանափակ շրջան, այլ մի ուրույն լեռնաշխարհ է՝ կիրճերով, սարահարթերով ու հովիտներով: Դերսիմի բնական սահմանները բնորոշելու համար պետք է առնել արևելքից Բաղեշի, հյուսիս-արևելքից Կարնու, արևմուտքից Խարբերդի (Քարբեհրդ), հարավ-արևմուտքից Տիգրանսուկերտի նահանգները: Սրանք Դերսիմի արտաքին սահմաններն են, իսկ ներքին սահմանագծումը հետևյալն է՝ արևելքից Բյուրակնյան (Բինգյուլի) լեռնաշղթան՝ Մանազկերտը, հարավից՝ Ճապադջուր-Բալու, Բերկրի (Բերի), հարավ-արևմուտքից՝ Չարսանջակ և Խոզաթ, հյուսիս-արևմուտքից՝ Օվաճզ, Կամախ (Քյամախ), իսկ հյուսիսային ամբողջ տարածությունը արևելքից արևմուտք՝ Քղի, Դերջան և Երզնկա (Երիզավան), մինչև Կամախի նշանավոր կիրճը, իր մեջ առնելով Սանսա (Սանասար) կիրճը և Երզնկան Դերջանից բաժանող Ճիպիճի բարձունքը:

Դերսիմը գտնվում է զույգ լեռնապարիսպների կենտրոնում: Առաջին լեռնապարիսպը սկսվում է արևելքից՝ Բյուրակնյան (10757 ոտք բարձր ծովի մակերեսից), Մեծ Պաս (Ապաս, 7997 ոտք), Պաշքենտ (6090 ոտք) և Քանթարի լեռներ (8438 ոտք)¹: Դեպի հարավ՝ Սերոքի (Սերոքի) լեռները, Հաճըյան (5885 ոտք), Փոքր Պաս (Ապաս, 6640 ոտք) գագաթներով: Այա ուղղակի հարավ, արևելքից մինչև արևմուտք ձգվում է Տավրոսի լեռնաշղթան՝ Տարքոչ-տերե, Ղոչ-Ղոչի ձոր, Սյուրի-Սյուրի, Բալուի լեռներ և Սարի-մեշե կետերով: Արևմուտքից՝ Չարսանջակի լեռնաշղթան, հյուսիս-արևմուտքից՝ Քաղցր-չուրի լեռները (8000 ոտք) և Մնձուր լեռը (8500 ոտք):

Հյուսիսային մասն են կազմում Տողան-պապա, Ղազան-Ղայա (3163 մ), Մեռճան. (3000 մ) և Ավզերտի-Կետիկ լեռները²: Հյուսիս-արևելքից՝

Աղջրի-սարեր, Սեբար (Ղարա-Ղայա), Կարմիր-բերդ (Ղըզըլ-Ղալե, 7133 ոտք) լեռները:

Կենտրոնական Դերսիմը կամ միջուկը՝ Ղութի-տերեսին, որ ամենաանաոխն է, շրջապատված է հյուսիս-արևմուտքից, հյուսիսից և հյուսիս-արևելքից՝ Գեղամա, Տուժիկ-պապա, Պաղր-պապա, Շեյթան-ղայա, Սուրբ-լույս (Սելպուս), Աղատ-բերդ (Քղիի կողմից), Վիշապասար, Սել-սանջակ և Մալ լեռներով: Հարավում, արևելքից-արևմուտք, Տավրոսի լեռնաշղթայի ուղղությամբ, ձգվում են Դերսիմին նայող հաջորդ լեռնագագաթները:

Այսպիսով, Դերսիմը ինքն իր մեջ կղզիացած, բնական լեռնապարիսպներով պաշարված, անմատչելի ապառաժներով պաշտպանված և արտաքին աշխարհից կտրված ինքնանկախ լեռնաշխարհ է:

ԳԵՏՏՐ ՈՒ ԳԵՏԱԿՆԵՐ: Եփրատ կամ Ֆռաք: Սկիզբ է առնում Բյուրակնյան լեռների հյուսիս-արևելյան կողմերից բխող հազարավոր աղբյուրների մշտահոս ջրերից և հյուսիսում նախ թեքվելով դեպի աջ, ապա փոխելով ուղղությունը դեպի արևմուտք, անցնում է Մամախաթունի առջևից և Դերջանի հովիտը երկու մասի բաժանելով, Կոթե-րի պատմական կամուրջի տակով, Վիժանի առջևից հոսելով ուղղակի արևմուտք, Ճիպիճի լեռան ստորոտում ճեղքում է Սանսայի կիրճը և դուրս գալիս Երզնկայի հովիտը ու շարունակելով ընթացքը դեպի արևմուտք, Կամախի կիրճից անցնում է Կամախ, ապա դառնալով դեպի հյուսիս-արևմուտք և Մեծկերտի առջև դուրս գալով Կամախի սահմաններից, անցնում է Բյունյուկիան և դեռ Ակն քաղաքը չհասած, հյուսիս-արևմուտքից հանկարծ շրջվում է հարավ-արևմուտք և Ակնի առջև բոլորակ գիծ ձևացնելով, շարունակում ընթացքը դեպի Մովք, ուր Մովքի և Կապան-մատենի առջև միանում է Դերսիմից եկող իր քրոջը՝ Արածանի գետին:

Եփրատի ձախ ճյուղը՝ Ալաօսանիս, ծնունդ առնելով նույն Բյուրակնյան լեռների հարավ-արևելքից, գրեթե Եփրատին ղուղահեռ, բայց բոլորովին

¹ Լեռների բարձրության չափերը առել են ինչի քարագից, որ բոլոր բարձրությունները նշանակված են ոտքով:

² Լեռների մետրային չափի բարձրությունը առել են «Օսմանեան կայսրութիւն» քարտեզից (Կ. Պոլիս, 1913):

տարբեր շրջաններից անցնելով, թեքվում է դեպի արևմուտք, ուր որպես Մուրատ-շայ ծապաղ-ջրի առջևից կտրում է Դերսիմի սահմանը և ապա, Քղիի տակ՝ Լըշըկ-գետ, հետո՝ Բալվագետ ու Բերի-դետ կոչվելով, անցնում է Խոզաթը Դերսիմից բաժանող նշանավոր կիրճը և դուրս դալիս Դերսիմի ներքին սահմաններից ու Մովթի մեջ միանում Նփրատ դետին:

Այսպես, Նփրատն ու Արածանին, Բյուրակնյան լեռներից մինչև Կտպան-մաաին Դերսիմն առած իրենց բազուկների մեջ, նրան տալիս են մեծ թեքակղզու երևույթ:

Այս դետերն իրենց մեջ ընդունում են շատ դետակներ և առատահոս ջրեր: Արածանին մինչև Ճալաղջրին հասնելը հատվում է տասնյոթ ջրատար ձորի հետ: Առաջինը Մանգվեթի շայն է, որն իր ծագումն առնում է Նուրետին սարից (5370 ոտք): Երկրորդ ջուրն իր սկիզբն առնում է Ավրանք լեռան արևելյան կողմից, իսկ երրորդ, չորրորդ և հինգերորդ ձորերը՝ նույն լեռան արևմուտյան գագաթներից, ու բոլորն էլ առանց մեկը մյուսին միանալու և հոսելով տարբեր ուղղություներով, իրարից որոշ հեռավորությունների վրա միանում են Արածանին: Վեցերորդ և յոթերորդ ձորերն իրենց ծագումն առնում են Գարասիտ լեռան լանջերից և Շարպայի գյուղի առջև միանալով իրար՝ առնում են Շարպայի-ջուր անունը և Խանձոր գյուղի ստորոտում դարձյալ միանում Արածանին: Հաջորդ վեց ձորերը սկիզբ են առնում ջրառատ Պասի (Ապաս) կողմից: Դրանցից երկուսը՝ Նոր-շեն գյուղի ստորոտում, իսկ մնացյալները Զիարեթ գյուղի ստորոտում խառնվում են Արածանին: Մնացյալ չորս ջրերը ծագում առնելով Փոքր-Պասի և Քարախայա լեռներից, Արածանին են հասնում ծապաղջրից դեպի արևելք, Նեվշան գյուղի ստորոտում:

Լըշըկի-ջուրը (Արածանիի գլխավոր վտակներից մեկը) իր ծագումն առնում է Դերսիմից հյուսիս-արևելք և Քղիից արևելք գտնվող Կարմիր-բերդի լեռներից: Այս գետին միանում են տասնըվեց ձորեր, որոնցից առաջին հինգը սկսվում են նույն լեռան արևելյան գագաթներից: Այնուհետև անցնելով Ճաֆեր-պապա լեռան ստորոտից և ս. Կիրակոս վանքի արևելյան կողմում թեքվելով դեպի հարավ, Աթուն-Հյուսիսի և Ազատ բերդի շրջակայքում դետը փոխում է ուղղությունը դեպի հարավ-արևմուտք, ապա հոսելով Բեղմորուքի, Հորհորի, Հալատոսի, Սանջակի, Զաթի Սիմսորի և Մանսուրի շրջակայքով և իր մեջ ընդունելով համանուն ձորերի ջրերը, Շարիպ գյուղից վեր ընդու-

նում է Ճաֆեր-պապայից ծագում առնող հինգ և Սանջակ լեռից սկսվող վեց ձորերի ջրերը, Լըշըկ-շայ դետը միանում է Արածանին:

Երկրորդ մեծ ջուրը, որ միանում է Արածանի դետին, Քղիի ջուրն է: Սույն գետը, որ քաղաքը բաժանում է երկու մասի, նախքան քաղաք հասնելը կոչվում է Քարայրաձոր, որն իր անունն առած է Դավթի-սարի վրա գտնվող քարայրներից (որոնք լյուլանդացիների կողմից փորված հանքահորեր են, և որոնցից մեկը շատ երկար է): Քարայրաձորի գետակին միանում են Միանձում և Սեիտ-Ղասս լեռներից հոսող համանուն ձորերի ջրերը, իսկ բուն Քղիի ջուրը իր ծագումն առնում է Աթ-դահա-լեռից: Սա իր հերթին ընդունում է երկու մեծ ջրեր՝ Ֆեմի ջուրը (որը կազմվում է երեք ճյուղից) և Կապույտ ծովի ջուրը: Քղիի ջուրն անցնելով Առնես գյուղի վերևից և քերելով Մեղրե, Այ-գեստան և Խոր-Խոռ գյուղերի եզերքները, Շեյթան-ղայա լեռան ստորոտով հասնում է Քղիի տակ: Միացյալ այս ջրերը կոչվում են Գայլ գետ (չփոթել Նրզնկայի արևմտյան և Կամախի արևելյան կողմը գտնվող Գայլ գետի հետ):

Կապույտ-ծովի ջուրը իր ծագումն առնում է համանուն լեռան (Կապույտ լեռ) լճից: Սա թեև շատ մեծ չէ, բայց շատ խորն է և խնայած իր մեջ որևէ գետ չի ընդունում և սկիզբ է տալիս համանուն դետին, տարվա չորս եղանակներին ոչ ավելանում է, ոչ պակասում: Այս ջուրը անցնելով Կապույտ-ծով գյուղի միջից, թեքվում է դեպի հարավ և Հաղստան գյուղից վեր միանում Զոխմախի ջրին: Զոխմախի ջուրը իր անունն ու ծագումն առնում է համանուն լեռից, որը գտնվում է Քղիից հյուսիս-արևելք, դեպի Դերջան երկարող լեռնաշղթայի մեջ: Հոսելով դեպի հարավ, անցնում է Ապառ բերդաքաղաքի ստորոտով՝ դեպի Առեր (Առավիթ), ապա Օրոր գյուղը, որտեղ նրան միանում է Օրորի ջուրը: Սրա ակունքը Աստղաբերդի սարերն են: Օրորի ջուրը այնուհետև անցնելով մի քանի գյուղերով, միանում է Քղիի կենտրոնական ջրին՝ Գայլ գետին, սա էլ միանում է Բուլմորիի ջրին:

Բալմուրիի ջուրը բաղկացած է տասնչորս ձորերից, որոնցից չորսը ծնունդ են առնում Պաղր-պապայի արևմտյան և հարավային լանջերից, չորսը՝ Ղուզուլջանի լեռներից, չորսը՝ Տուփկ-պապայի կողմերից, իսկ մնացյալ երկուսը՝ Սել (կամ Սեմ) լեռան ակունքներից: Այնուհետև Բուլմորիի ջուրը հոսելով դեպի հարավ-արևմուտք, Սաղան և Պայագիտ գյուղերի միջև միանում է Մանձուրի ջրին (Մունզուր-ջուր):

Մեծուրի ջուրը կազմվում է յոթ ձորերից: Առաջինը Մեծուր-ջուրն է, որը բխում է Մեծուր լեռան դեպի Դերսիմ նայող գագաթներից, երկրորդը և երրորդը՝ Օվաճգի Քաղցր-ջրի լեռներից: Դրանք անցնելով Փիր-Սուլթանի ստորոտով և թեքվելով դեպի հարավ, Դաշտակի մոտ միանում են իրար, իսկ մնացյալ չորս ձորերը, որ ծնունդ են առնում Տուժիկ-պապայի հարավ-արևելյան բարձունքներից և հոսելով Հալոբիի ս. Կարապետ վանքի աջ և ձախ կողմերով, ճիշտ վանքի տակ միանում են իրար և կազմում Մեծուրի ջուրը, որը Բոլոմորիի ջրի հետ գերկընդիսառն հոսելով դեպի արևմուտք, խառնվում է Դաշտակի ջրին:

Դաշտակի ջուրը ևս իր ծագումն առնում է Օվաճգի Քաղցր-ջրի լեռներից, որին միանում են Բոզվանքի և Մազկերտի երեք ձորերը և խառնվում Բոլոմորիի ջրին:

Միացյալ այս ջրերը հոսելով դեպի հարավ-արևմուտք, խառնվում են Քղիից եկող մեծ ջրին և Բերիի ջրի հետ միասին թափվում Արածանին:

Արածանին իր մեջ ընդունելով վերը նշված ջրերի հոսանքը և առաջանալով դեպի արևմուտք, դեռ Դերսիմի կիրճից դուրս չեկած, ընդունում է Խոզաթի, Չարսանջակի և Պաղաձորի ջրերը:

Խոզաթի ջուրը կազմվում է երկու ջրից՝ Դաշտակի արևմտյան բարձունքներից և Արսենիկի արևմտյան լեռներից իջնող վտակներից, և թափվում է Արածանի:

Չարսանջակի ջրին միանում են Կյուլյուքի և Պաղաձորի ջրերը և հոսելով դեպի արևմուտք ու թեքվելով հարավ, Եղրևանի առջև միանում են Արածանիին:

Պաղաձորը բացի իր ձախ թևից, որ միացած է Չարսանջակի ջրին, ունի և մի աջ բազուկ, որն սկիզբ է առնում համանուն լեռներից և հոսելով միշտ դեպի հարավ, տեղ-տեղ նույնիսկ թեքվելով արևելք, Աշխենիկ գյուղի ստորոտում միանում է Արածանիին:

Այժմ հետևենք Քղիից Կամախ, ձախ ափից Եփրատին խառնվող ջրերի հոսանքին:

Աղի-ջուրը ծագում է առնում Ղարա-Ղայալի և Զերտիկի լեռներից: Կազմվում է յոթ ջրերից: Սրանցից առաջինը բխում է Կարմիր բերդի լեռան հարավային բարձունքից, որը գտնվում է Կարնո արևմտյան կողմից դեպի Մամախաթուն երկարող լեռնաշղթայի ճիշտ կենտրոնում: Անցնելով Հայտարի գյուղի առջևից, հոսում է դեպի արևմուտք: Երկրորդ և երրորդ ձորերը սկսվում են Զերտիկի լեռան արևմտյան կողմերից և անցնելով Զերտիկ

և Մերտիվեն գյուղերից, Սոս գյուղի առջև միանում են առաջին ջրին: Զորրորդ ձորի ջուրը, որ ծագում է առնում Ղարա-Ղայալի արևմտյան լանջերից, անցնելով Օվաճգ (չփոթել Երզնկայի համանուն ավանի հետ) և Բելեկոս գյուղերի առջևից, Յալա-ճոգի տակ ընդունում է հինգերորդ ձորի ջուրը, որը հոսելով դեպի հյուսիս-արևմուտք, Քարսան գյուղի ստորոտում միանում է առաջին երեք միացյալ ջրերին: Վեց և յոթերորդ ձորերի ջրերը, որ ծագում են առնում Յալաճոգ լեռան բարձունքներից, Յալաճոգ գյուղի ստորոտում միանում են վերի հինգ ձորերի ջրին և հոսելով դեպի հյուսիս, Հայք (չփոթել Դերսիմի Հայքի հետ) և Կոթևր գյուղերի միջև միանում են Եփրատին:

Խաբխիսի օռար ծագում է առնում Կեիկտաղիի արևմտյան բարձունքներից և հոսելով դեպի հյուսիս ու միանալով երկրորդ ձորակի ջրին, Խաբխիսի տակ միանում է Եփրատին:

Մոզանի գույզ ձորերից առաջինը ծագում է առնում Ագվերենի գագաթից և հասնելով Մոզանի ստորոտը, միանում է երկրորդ ձորին, Զիաերիի մոտ խառնվելով Եփրատին:

Ագվերենի ջրի աջ ու ձախ ճյուղերը, որ ծագում են առնում՝ առաջինը Կերտիմի լեռից, երկրորդը՝ Պաղինից, Ագվերեն գյուղից վեր միանում են իրար և Սանսա կիրճի մոտ խառնվում Եփրատին:

Սաճա կիրճի առաջին ջուրը կազմվում է Պաղին լեռան արևմտյան լանջերից, իսկ երկրորդը՝ Ավգերտ լեռան արևելյան կողմերից, որոնք Փինթիկ դուղի ստորոտում միանում են Եփրատին:

Թլակա ջրի երեք ճյուղերը ծագում առնելով Ավգերտից, զանազան ուղղությամբ հոսելով հասնում են Թլակ և դեռ գյուղ չմտած միանալով իրար, նույն գյուղի ստորոտում խառնվում են Եփրատին:

Էրտինեի ջուրը կազմվում է չորս գլխավոր ձորերից, առաջին երկուսը՝ արևելյան, երրորդը և չորրորդը՝ արևմտյան գագաթներից հոսելով դեպի հյուսիս, ապա թեքվելով հյուսիս-արևմուտք, էրտինեի գյուղի ստորոտում միանում են իրար և Առան գյուղից ներքև խառնվում Եփրատին:

Ղալաճուղի ջուրը ծագում է առնում Պաղրի հարավային բարձունքից և անցնելով Նշան Խանջյանի ագարակի միջից, թեքվում է դեպի արևմուտք և Շխլիի դիմաց միանում Եփրատին:

Եփրատ դետը Տիպեռլիի (Երզնկան Կարինին կապույ պետական միակ խճուղին) դիմաց, Թլակից չիշ վար բաժանվում է երկու թևի, մեկը՝ աջ,

մյուսը՝ ձախ հոսելով, իրենց բազուկներին մեջ են առնում Մխիթի և Սերթիքի թրքաբնակ գյուղերը և ձվածկ մի մեծ կղզի կազմելուց հետո, Վերին Ղատաղանի առջև նորից միանում են ու շարունակելով հոսել դեպի արևմուտք, Տենիդտամիի առջև կրկին բաժանվում են երկու ճյուղի՝ Մեծ գետ և Պզտիկ գետ անուններով, ապա շրջապատելով Մահմուտցիք, Քերթուղե, Պալի-պեկ և Կյուլիճե գյուղերը ու կազմելով երկրորդ մեծ կղզին, Արշակա կամուրջի առջև միանում են իրար:

Մեծուր-չալի (կամ Մեռչանի) ջուրը կազմվում է հինգ ճյուղերից, որոնցից երկուսը ծագում են առնում Մեծուր լեռան գագաթներից, երրորդը՝ Քելլեր լեռից, իսկ չորրորդը և հինգերորդը՝ նույն լեռան հյուսիսային կողմերից: Առաջին ձորը անցնելով Մաղա-չրի առջևից, հասնում է Զարչարանաց ո. Գրիգոր լուսավորչի վանքը, որտեղ միանալով առաջին երկու ձորերին և շարունակելով հոսել դեպի հյուսիս, Սրպիան (սուրբ Օհան) քերդարնակ գյուղից վեր միանալով չորրորդ և հինգերորդ ջրերին և անցնելով Բլուր և Ուեկ գյուղերի միջից, նույն գյուղի ստորոտում միանում է Եփրատին:

Քիի ս. Հայրապետի վանքի և ուսումնադանի ջրերը ծագում են առնում Մեծուր լեռան աջ և ձախ գագաթներից, նախ հոսելով դեպի հյուսիս, ապա թեքվելով դեպի արևմուտք, ս. Գեորգ վանքի առջև միանում են ու անցնելով Երկան, Կենցիք, Նեւսես հայրապետի և Քիի միջից ու փոխելով ընթացքը դեպի հյուսիս, անցնում են Մաթերի վերևից ու Մահմուտցիք (Մալմուտցիք) գյուղի առջև միանում Եփրատին:

Թլխասի ջուրը կազմվում է երկու ձորից, որոնցից առաջինը Մեծուր լեռան արևմտյան գագաթից, իսկ երկրորդը՝ Ղազան-Ղայալի արևելյան բարձունքներից հոսելով, Թլխասից վեր միանում են իրար և անցնելով Բալանդալի առջևից, մեծ գետի կամուրջին չհասած, միանում են Եփրատին:

Հանդեսի ջուրը կազմվում է երեք ձորից, որոնք ծագում են առնում Ղազան-Ղայալի (Ղազան Գաղի) արևմտյան բարձունքներից և հոսելով զանազան ուղղությամբ, Հանդեսի արևմտյան կողմը, Արշակա կամուրջից քիչ վար, միանում են Եփրատին:

Կյազելեի ջուրը, որ կազմված է երկու ձորից, իր ծագումն առնում է Ղազան-Ղայալի հարավարևմտյան բարձունքներից, անցնելով Քրտգեղի միջից, Սրպիան գյուղի դիմաց միանում է Եփրատին:

Կամախի կիրճից մինչև Կապան-Մատեն՝ Եփրատի և Արածանիի միացման կետը, Եփրատի ձախ ափից գետին միացող առաջին մեծ ջուրը Պապթիկի ջուրն է, որ իր ծագումն առնում է Մըն-ձուր սարի հարավային բարձունքներից, անցնելով Բալանդալի արևմտյան կողմից, Կամախի կիրճի մուտքի մոտ խառնվում է Եփրատին:

Երկրորդը Հոռեկա երկու ձորերն են, որոնք սկսվում են համանուն լեռներից և մեկը՝ գյուղից աջ, մյուսը՝ ձախ հոսելով, նույն գյուղի ստորոտում միանում են իրար և խառնվում Եփրատին:

Երրորդը Քաղցր ջուրն է, որը կազմվում է չորս ձորից, որոնք ծագում են առնում Պաղասար լեռներից և Պարտի գյուղի ստորոտում միանալով իրար, Կամախի մոտերքում խառնվում են Եփրատին: Աջ կողմից, դարձյալ արևելքից արևմուտք, Եփրատ թափվող վտակներն են. առաջինը զանազան ուղղություներով հոսող և զանազան ձորերից կազմված Աշղալալի ջուրն է, որ Մամախաթունի դիմաց միանում է Եփրատին:

Աշղալալից եկող ջուրը, որին կիճ գյուղի մոտ միանում են Ալթուն Քաղի երեք ձորերը, հոսելով նախ արևելքից արևմուտք, ապա Աղվեսի (Մղտեսի) ստորոտում թեքվելով դեպի հարավ, Բուրք (Բուլք) գյուղի վերից նոր անկյունադարձ կատարելով, իր մեջ է ընդունում Դերչանի զանազան ուղղություներից եկող մի շարք ձորեր: Այսպես՝ Ալթուն Քաղից եկող Աշղալալի ջուրը, շարունակաբար իր մեջ ընդունելով Գարատերենի (Գարատերենտ) երեք և Օթլուղ լեռից ծագում առնող յոթ ձորերը, Մանց գյուղի առջև (Մամախաթունի դիմաց) միանում է Եփրատին:

Դվեիկի, Պուլմուշի (Պալմուշ) և Տլավի (Տելավ) ջրերը գրեթե նույն ուղղությամբ ծագում են առնում Օթլուղի բարձունքներից և հաջորդաբար միանում Եփրատին:

Ջուրունի (Սուրեն) ջուրը, որ ծագում է առնում Մլեբրդ (Մհերի բերդ) բարձունքներից, խառնվելով ս. Թորոսի ջրին և Մեծ Գեղի ջրին ու կտրելով Երզնկա-Կարին խճուղին, Սանսա կիրճի հյուսիսային կողմից միանում է Եփրատին:

Ղաբաճալարի և Պառաճաճի ջուրը իր ծագումն առնում է Մլրերդի ստորոտում գտնվող Կարան-Կուլից (Կարապանների լիճ), անցնելով ս. Թորոս վանքի արևմտյան բարձունքներից և հոսելով դեպի արևելք, ապա թեքվելով դեպի հարավ, Ղաբաճալար և Պատուան գյուղերի ճիշտ մեջտեղում 150 մետրից ավելի բարձր ժայռից թափվելով վար, շարունակում է հոսել գյուղերի ու մշակելի

դաշտերի միջից, Սանսա կիրճի ստորոտում ընդունելով Չալ-Դոմի ձորի ջուրը, միանում է Եփրատին:

Խնձորեկի ջուրը կազմվում է Կարմիր լեռից բխող մեծ ակից, որին միանում են նաև զանազան ձորակներ, Լեռնակա ձորից թեքվելով արևելքից հարավ և անցնելով Բերդակ լեռան ստորոտից, կոչվում է Բերդակ ձոր ու Թլակի դիմաց խառնվում Եփրատին:

Հայտառի ձորի ջուրը անցնելով սարերից, մտնում է Խնձորեկ գյուղը և հասնելով Տինկ, անցնում է Սանսաորի դաշտագետից, Ղորոտի անտառների ստորոտից և խալի Աղալի խանի (սա Կարին-Երզնկա ճամփի կարևոր օբյեկտներից է) առջև միանում է Եփրատին:

Ձոր-Քերեա ջուրը այս շրջանի ամենամեծ գետն է, որն իր ծագումն առնում է Վերին Քոնիկի լեռներից և ընդունելով Զերմակ Քարերի և Վարի-Քոնիկի ձորերի ջրերը ու հոսելով դեպի արևմուտք, Հարսի տակ ընդունում է Մեծ-Սորի լեռան անտառների ջրերը ու մի քանի այլ ձորերի ջրեր և Ձոր-Քերեա խանից մի քիչ վար, ճիշտ Մթին կամուրջի մոտ միանում է Եփրատին:

Բաղնիքի ջուրը՝ հանրաժանոթ իր առատությամբ, զուլալությամբ, դուրամարսությամբ ու պաղությամբ, կազմվում է ութ ձորակներից, իր ծագումն առնում է ս. Նիկողոս վանքի վերևի Քեշիշ-Տաղի կենտրոնական գագաթի ստորոտից և ընդունում Գալունի և Կոլերի սարալանջերից բխող երեք ձորերի ջրերը: Հասած Բթավիճ (Բթառիջ) գյուղին, բաժանվում է երկու ճյուղի, որոնցից մեկը հոսում է դեպի արևելք և անցնելով Գալառիճ (Գալառիս), Փշկըթաղ (Փրկաթաղ) թրքաբնակ գյուղերի լայնատարած այգիներից, թեքվում է դեպի հարավ, իսկ երկրորդը, որ հոսում է դեպի արևմուտք, անցնում է Բթառիջ գյուղի (հայ և թուրք խառն) այգիներից ու ընդունելով ս. Պողոս-Պետրոս վանքի ջուրը, միանում է Եփրատին:

Ջերմուկի ջուրը: Շատ հետաքրքիր է այս ջրի ծագումն ու վախճանը: Լեռան ճիշտ ստորոտից գոմեշի մարմնի երկու հաստությամբ մուգ երանգի ջուր է, դուրս է ժայթքում երկրի ընդերքից, ոչ ծագում ունի և ոչ էլ զարգացում, կարծես ստորերկրյա մի մեծ ուժ լույս աշխարհ է մղում այն: Զուրը տաք է և հանքային, հոսում է հյուսիսից հարավ և հագել տասնյակ ջրաղացների ջուր հայթայթելով, կրկին չքանում է:

Ջերմուկի ջրից բավական վար, բայց ճիշտ չերմուկի նման անալիզով լույս աշխարհ է գալիս

մի երկրորդ ջուր, Սե-ջուր անունով: Սա ևս մուլ երանգի ճահճային ջուր է, խոր ու անանցանելի, ոչ-ոք չի համարձակվում մտնել մեջը, որովհետև հատակը տղմուտ է և հոսանքն ուժեղ: Հագել դուրս եկած, Բզվան գյուղից մի քիչ վար խառնվում է Եփրատի աջ բազուկ Պատիկ գետին:

Վասկերտի ջուրը, որի գլխավոր ճյուղերից մեկը ծագում է առնում Սբնգոր գյուղի վերևի համանուն լեռան լանջերից, անցնում է ս. Կարապետ վանքի տակից և Յալանջ-Պաղի տակ միանում վանքի աջից հոսող և նույն լեռներից բխող իր երկրորդ թևին, թեքվելով դեպի հարավ-արևմուտք անցնում է Մթինի, Հայրապետի վարի և վերի ու լանիքի միջից և Սիրպիհան գյուղի առջև միանում Եփրատին:

Երզնկայից դեպի արևմուտք, Վասկերտից հետո երկրորդ մեծ ջուրը Ուռու-Սեռայի ջուրն է, որը բաղկանում է երեք առանձին ջրերից: Առաջինն իր ծագումն առնում է Սբնգորի արևմտյան կողերից, իսկ երկրորդ ու երրորդ ձորերի ջրերը Աղտաղից հոսելով դեպի հարավ և անցնելով Մեշիթթաղ և Խորանթաղ թրքական գյուղերից ու ճեղքվելով Երզնկայի հովիտը հյուսիսից հարավ և առանց միանալու արևելյան կողմից եկող Վասկերտի ջրին, նրա միացման տեղից քիչ վար խառնվում են Եփրատին:

Մագում առնելով Չարտախլի լեռներից ու անցնելով համանուն կիրճից և այդ հոսանքում կոչվելով Չարտախլի ջուր, Գայլ գետը ընդունում է Աղտաղից եկող մի երկրորդ ջուր՝ Աղկի ջուրը, ապա Կարդանաշահ գյուղի մոտ Կարմիր վանքի ձորի ջուրը, որն իր ծագումն առնում է Գոհանամ լեռան վերին լանջերից և իր մեջ ընդունելով Սեպուհ լեռան հյուսիսային բարձունքներից կազմված երկու ձորերի ջրերը, անցնում է Կյոհճի, էսէսի և Կարմիր գյուղերից: Գայլ գետին Թիլ ալանի մոտ միացող չորրորդ ջուրը ս. Շողակաթի ջուրն է, որն իր ծագումն առնում է Սեպուհից, անցնում ս. Շողակաթ վանքից և հոսելով դեպի արևելք, միանում Շոխայի ջրին: Հինգերորդ ջուրը ս. Հակոբ վանքի ձորին է, որն իր ծագումն առնում է Գոհանամի արևելյան կողերից, անցնում վանքի առջևի և Սեկեկի ստորոտից հոսելով դեպի արևելք, Փյուրտազրակից վեր միանում է Գայլ գետին, իսկ սա՝ Եփրատին:

Կարմիր լեռից, Մարեֆի լեռներից, Երեք եգար լեռան գագաթներից և Սեպուհի հարավային լանջերից ծագում են առնում չորս ջրեր: Սրանք Եփրատին են խառնվում: Թանաձորի ջուրը անց-

նկնով Անիւ ամրոցի (Ամուրբերդ) վերեւից, Կամախի ստորոտում, ս. Լուսավորիչ վանքից եկող և Ավագ վանքի ջրին միացող Սերովրե վանքի ջուրը՝ Վարի Բագառիճի տակ, Մարեգի ջուրը, որը ծագում է առնում համանուն լեռներից և իր մեջ ընդունում երեք վտակ, Մարեղ գյուղի ստորոտում, Բերդերի ձորի ջուրը, որ ծագում է առնում ս. Ասավածաթնի մատուռի ստորոտից, հասնում է Բերդերին, միանում Պահարկա ջրին ու հոսելով դեպի Գառնի, ընդունում Բալամատ ձորի ջուրը, Թորգոմա բերդի ստորոտում:

Այսպիսով, Եփրատի երկու թևերը, վերը նշված հոսանքներով կղզիացնելով Դերսիմի, Խոզաթի, Բերիի, Բալուի, Քղիի, Ճապաղջրի, Երզնկայի և Կամախի լեռները, կիրճերն ու լեռնահովիտները, Կապան-Մատենի առջև միանում են իրար: Ահա սրանք են կազմում Դերսիմի և նրա անմիջական շրջանների լեռնային պատվարները և ջրերի հոսանքները:

ԿԻՐՃԵՐ: Եփրատն ու Արածանին արևելյան կողմից ունեն երկու մուտքի, արևմտյան կողմից՝ Իրկու ելքի գլխավոր կիրճեր և շորս զարտուղի կամ միջանկյալ կիրճեր: Դրանցից առաջինը Սաե-սայի (Սանասար) կիրճն է, որը Դերջանը միացնում է Երզնկային և որով աղմկահույզ անցնում է Եփրատը: Դուրս գալով Երզնկայի արևմտյան հովտից, գետը դեմ է առնում Կամախի ապառաժներին, որոնք բնականից ճեղքված են, ու շուրջ քառասուն կիլոմետրի վրա գետին ճամփա են բացում: Ուրեմն, առաջինը Սանասայի կիրճն է, համանուն գյուղի մոտ, ուր գետն ընկնում է Երզնկա-Կարին խճուղու ձախ կողմը, իսկ երկրորդը՝ Կամախի ելքի կիրճը: Մյուսը Ջառախլիի կիրճն է, որ թեև կապ չունի ոչ Եփրատի և ոչ էլ Դերսիմի հետ, բայց դեպի Սև ծովի Կիրասուն նավահանգիստը տանող գլխավոր խճուղին անցնում է այս կիրճով: Այս կիրճը գտնվում է Երզնկայի հյուսիս-արևմտյան կողմն ընկած Սրնքարի լեռան՝ Զիմեն-տաղի միացման և Զարտախլիի լեռների հանդիպակաց Աղտաղի լեռների միջև: Սկսվում է Աղկե քրդաբնակ գյուղի ստորոտից և երկարում նախ դեպի արևմուտք՝ Կամախի ուղղությամբ, ապա թեքվելով դեպի հյուսիս, օձանման գալարումներով ուղղվում է դեպի Գարատաղի բարձունքները:

Դերսիմի ինքնամփոփ շրջանի արևելյան սահմանի գլխավոր դուռը Տավրոսի լեռնաշղթայի արևելյան ճյուղի և Ճաֆե-պապա լեռան միջև գտնվող խիստ դժվարանցանելի նեղ անցքն է, որը կոչվում է Տերսիմ-Պողազի: Այստեղով Արածանին մտնում է Դերսիմի սահմանները:

Քղիի կողմից Դերսիմը արտաքին թշնամիներից պաշտպանողը Կալխաշի կիրճն է: Տինկ և Պեկ-թաղո գյուղերից վեր, անդնդախոր ձորի հոսանքի ուղղությամբ երկարող այս կիրճի մուտքի և ելքի դռները դյուրավ պաշտպանելի են:

Համանման կիրճեր գոյություն ունեն Բուլմուրիից Խոզաթ, Զմշկածաղից Երզնկա, Ղըղըլքիլիսից Բալու տարածվող լեռնաշխարհում:

Համեմատաբար նվազ նշանակություն ունեն Հավլորիի ս. Կարապետ վանքի, Հողաջուրի, Սաղմանի, Իքձորի, Խաչի-Բահի, Տերե-արեանի (Ջաղարչների ձորի), Սարո և Սիմ կիրճերը:

Ամենակարևորներից է Խուֆաց-ձորը (Գութու-աերեսի), որը հարավից ձգվում է դեպի հյուսիս և թույլ չի տալիս, որ Խարրերդից կամ Երզնկայից անցնին Դերսիմի սահմանները: Սա համարվում է Դերսիմի ինքնապաշտպանության գլխավոր պատենջը: Այս կիրճի նախադուռը Իքձոր գյուղն է, իսկ երկու կողմից կիրճը շրջապատող ամենաբարձր գագաթներն են՝ Պազը (3300 մ), Գարաճա Գալե (3100 մ), Պաքուր (3150 մ) և Հել (3200 մ): Կիրճը ձգվում է մինչև Մազկերտի և Ղըղըլքիլիսի մոտերը: Անանցանելի այս ժայռերի մեջ մեծ ճիգերով փորված շատ նեղ արահետով միայն հետիոտն մարդը կարող էր անցնել: Վարր անդնդախոր ձորն է, վերը՝ երկնասլաց ապառաժներ, արահետը գոտիի նման ժապավինաձև երկարում է ապառաժների սրտից, առանց աչ կամ ձախ թեքվելու: Ամեն ճամփորդի տրված չէր կյանքը վտանգելու գնով անցնել այս կիրճով: Բարեբախտաբար, տեղ-տեղ, արահետի երկայնքին, խորություններ էին փորված՝ ճանապարհ տալու համար, այլապես երկու հոգի քով-քովի և կամ՝ դիմացից եկողը, առանց այդ փորվածքից օգտվելու, անկարող էին անցնել: Կիրճի երկու եզրերի ապառաժների մեջ կային արհեստական քարայրներ, գետնուղիներ, շտեմարաններ, մեկը մյուսին կապող անցքեր և սենյակներ, նաև մեծ տապանաքարերով գերեզմաններ: Քարայրներն օգտագործում էին որպես զինապահեստ և սննդեղենի մթերանոց, այդտեղ պահում էին նաև անասուններ: Կենտրոնական քարայրներից մեկի մեջ կար տաք ջրի ակ և քարափոր ավազան: Տաք ջուրը, որը դուրս էր ժայթքում մոխրագույն մի ապառաժի կրծքից, լցվում էր ուղղակի ավազանի մեջ, ապա քարափոր մի խողովակով ժայռերից վար թափվում:

Տաք ջրի ավազանի քարայրից հազիվ 50 մետր հեռավորության վրա կային և պաղ աղբյուրի ակեր, որոնք դուրս էին ցայտում կարմրագույն և վարդագույն ժայռերի կրծքից և միանալով իրար,

մի փսրորիկ գետակ կադմում ու մի ժայռի լար-
ձունքից, ավելի քան 1500 մետր բարձրությունից,
թափվում ենք Թալեհի ժայռերի վրա:

Արևմտյան լեռնաշխարհի պաշտպանության
երկրորդ մեծ կիրճը կոչվում էր Նեփթիլեն: Սա ևս
անառիկ և դժվարանցանելի էր, թեև նախորդի
չափ երկար չէր, բայց տեղ-տեղ մյուսից ավելի
անմատչելի ապառաժներով էր շրջապատված:
Նույնպես ուներ ժայռերի մեջ փորված մի նեղ ա-
րահտ, որը կանգ էր առնում հսկա ապառաժի
առջև և արգելակում վերելքը: Հնարավոր չէր աչ-
կամ ձախ շարժվել, անդունդին նայելն անգամ
մարդու սարսափ էր պատճառում և սակայն գա-
րեւ առաջ այս կարճ ճամփան օգտագործելու և
հաղորդակցության գիծը խարբերողի ու Ծրզնկայի,
ի մասնավորի Տրապիզոնի հետ պահելու համար,
հսկայանիստ և բարձրադիր այս ժայռի վրա հար-
յուր աստիճան սանդուղք են փորել: Քարափոր
աստիճաններով ժայռի կատարը հասնելուց հետո,
քարափոր արահետը նույն ձևով շարունակվում էր:
Ամենահետաքրքիրը կիրճի երկու կողմի ժայռերի
մեջ փորված բնակարաններն էին: Սրանք այլևս
անձավ, քարանձավ կամ քարայր չէին, այլ
ուղղակի բնակարաններ, կենտրոնում՝ մեծ սրահ
հարակից սենյակներով, շտեմարանով և նույնիսկ
անասունների գոմերով ու ախոռներով: Դրանց
կառուցվածքից և դասավորումից դատելով, բազ-
մամարդ ընտանիքներ բնակած լինելու են ամեն
մի բնակարանի մեջ: Սենյակներից ոմանք նկա-
րագրված էին քարափոր նկարներով՝ գեղա-
կերտ ծաղիկներ, զանազան ձևի խաչեր, պատերի,
նույնիսկ առաստաղների վրա բնակարաններ: Հար-
յուրից ավելի այս բնակարանների կենտրոնում
գտնվում էր ավելի մեծ և ընդարձակածավալ մի
բնակարան, որն իր մեծությամբ և նկարների շքե-
ղությամբ զանազանվում էր մյուսներից: Սրա
սրահի պատերին կային ուղղահայաց փորագրված
անժանոթ տառերով գրություններ, որոնք տառ
լինելուց ավելի, խազի նմանող նշանագրերի և
կամ զանազան ձևի գծերի էին նմանվում: Այս
գրությունները շրջակապված էին ծաղկանկարնե-
րով: Ամեն տուն ուներ ժայռերից դուրս ժայթքող
ցայտաղբյուրներ, որոնք գտնվում էին միջանցքի
նմանվող գետնուղիների մեջ: Տնից-տուն հաղոր-
դակցության կապը պահված էր գետնուղիներով:
Ամենաուշագրավը, սակայն, առանձին ժայռերի
մեջ փորված գերեզմանների և նրանց վրա դրված
տապանաքարերի երկարությունն ու լայնությունն
էր: Տապանաքարերից մի քանիսի վրա տեսնվում
էին մեծ սրահի պատերին փորագրված արձանա-

դրությունների նման դրություններ՝ վերից վար
ուղղահայաց ձևով:

Աշիրեթները որպես պահեստ և տեղ-տեղ էլ որ-
պես բնակարան էին օգտագործում քարափոր այս
տները, որոնցից ամեն մեկն ինքնապաշտպանու-
թյան մարտկոցներ և կամ անառիկ բերդեր էին:

Ալի-պողազի կիրճը գտնվում էր Չմշկածագի
սահմաններում: Այն թեև շատ երկար չէր, սակայն
շատ վտանգավոր էր: Այստեղ ևս կային քարայր-
ներ, արհեստական քարափոր սենյակներ և այլն,
միայն այն տարբերությամբ, որ այս քարայրների
մեջ ջրի ակերն ավելի շատ էին:

ՀԱՆՔԵՐ: Դերսիմը երկրաբանական առումով
հետազոտված չէ, բայց և այնպես մասնակի պըր-
պրտումներով, բյուզանդական ժամանակաշրջա-
նից մնացած մի քանի հանքերի գոյությամբ և ժո-
ղովրդի մեջ ավանդաբար գործածված բուժիչ ջրե-
րի ակերից և աղբյուրներից դատելով, կարելի է
հզրակացնել, որ այս շրջանը հանքային շատ մեծ
հարստություններ ունի:

Ապառ բերդաքաղաքի վերև գտնվող մեծ քա-
րայրը, որ բյուզանդացիների կողմից օգտագործ-
ված մի հանքահոր էր, մնում էր անօգտագործելի:

Ասվեց, որ մասնակի հետազոտություններ կա-
տարված են անհատների կողմից: Այսպես,
1912 թ. Տուժիկ-պապայի լերկ ապառաժներից
ժայթքող ջրառատ մի ակի ավալի քննությամբ
հաստատվեց, թե լեռը պարունակում է շատ հա-
րուստ ոսկեհանք: Ոսկեհանքի հարուստ պաշարներ
ունեն Պալապանի շրջանի խնձորեկ գյուղի սարե-
րից վերև գտնվող Կարմիր լեռը և գյուղի արևել-
յան կողմի Թամբար (կամ Թամբրա) լեռից բխող
Հալճից աղբյուրը, որը նույնպես քննությամբ հաս-
տատված է (1914-ին):

Դերսիմի մի շարք գյուղերում նախնական մի-
ջոցներով ստանում էին կապարի նմանվող մի
հանք, որը շատ հարուստ էր և ավելի կարծր, քան
կապարը և որից պատրաստում էին զանազան
զենքերի փամփուշտների միջուկները:

Դերսիմը հարուստ է ոսկու, արծաթի, պղնձի,
երկաթի, ցինկի, բորակի, կապարի, քարյուղի
(նավթի), ծծմբի, աղի հանքերով և հանքաջրերով:
Այսպես, Հավլորի գյուղից վերև, ս. Կարապետ
վանքի թիկունքին, գտնվում են ոսկու և արծաթի
հանքեր, որոնք օգտագործվել են անցյալում և ո-
րոնց հորերը մնում էին անվթար: Տեղացիները
երբեմն նախնական միջոցներով (փքոց) հալեցը-
նում էին այն և վաճառում: Տուժիկ-պապան հա-
րուստ է ոսկով, արծաթով, երկաթով և կապարով,
Սուրբ-լույս լեռան կողերը՝ կապարի, արճճի և

քարածուխի հանքերով: Պալապանի շրջանի լեռներից Հայտարի-սարը և Թամբարը քարածխի շտեմարաններ են, Կարմիր լեռը հարուստ է ոսկով: Դերջանի հովիտը քարյուղի առատ աղբյուրներ ունի, մինչև 1912 թ. Դերջանի ժողովուրդն իր քարյուղի կարիքը հոգում էր Մանձի և Ապրանքի առջև գտնվող, բայց չզտված քարյուղի լճերից, որոնք թուրք կառավարության կողմից փոխանակ շահագործվելու, սնդիկի և այլ քիմիական բաղադրությունների միջոցով ոչնչացվեցին:

Սրբնգոր լեռան արևմտյան կողմը, Կամախի մոտերքը կային քարածխի հարուստ հանքեր, որոնք միակ օգտագործվողն էին դեռևս հոռմեական ժամանակներից, սակայն նախնական ձեռքով:

Քղիի արևելյան սարերից մինչև Կամախի աղահանքի աղբյուրները, ավելի քան 170 կմ տարածությամբ, լեռների ընդերքից բխող աղբյուրներն իրենց հետ դուրս էին բերում աղի առատ պաշար, տեղ-տեղ գոյանում էին աղջրի ձորեր, որոնք նույնպես չէին օգտագործվում: Պետության և մասնավորների կողմից օգտագործված աղահանքերը հետևյալներն էին՝ Դերսիմի կենտրոնում, Լերթիկ գյուղի ստորոտում գտնվողը: Նախնական ձևով պատրաստված մոտավորապես 50 ավազանի մեջ հոսում էին աղաջրի աղբյուրներ և արևի ջերմությամբ քարանում: Շրջակա բոլոր գյուղերը օգտվում էին այս աղահանքից, ամեն գյուղ ուներ իր ավազանները և համագործակցական ձևով հավաքում էին աղը: Աղի բաժանումը կատարվում էր աշխատանքային օրվա հաշվով: Մյուսն Աղայե-Շենիկի աղահանքն էր, որն օգտագործվում էր Շահ Հյուսեին փաշայի ժառանգորդների կողմից: Այս աղահանքն իր ջրերի առատությամբ ամենամեծն էր: Երրորդը ս. Սարգսի անվանը նվիրված, հանրային սեփականություն նկատվող Խուղլան աղահանքն էր, որը գտնվում էր Քղիի շրջանում: Վենետիկ-Թուղլան աղահանքը գտնվում էր կառավարության հովանավորության տակ, սակայն այս շրջանների աղաջրերի առատության պատճառով կարելի էր լինում այն լայն չափերով օգտագործել: Հինգերորդը Աղայե-Շենիկից դեպի արևելք, Քղիի և Դերջանի միջև ընկած Աղամբարի (կամ Աղաձորի) ավազաններն էին: Աղի ջրի այս գետակն ավելի քան 30 կմ երկարության վրա աղ էր բաժանում այդ շրջանի ժողովրդին: Աղաներ, փաշաներ, բեկեր թեև տեղ-տեղ ավազաններ էին շինել և փորձել էին աղը սեփականացնել, սակայն որևէ արդյունքի չէին հասնել: Զրերի առատությունը և փոխադրական միջոցների

պակասը պատճառ էին եղել, որ ոչ ոք չկարողանար շահագործել անսպառ հանքային այս հարուստությունը: Աղի առատ աղբյուրներ կային Բոլոմորիի մեջ, Դերջանի Վարդենիկ գյուղի մոտ, որոնք օգտագործվում էին պետության կողմից: Հայտնի էին նաև Ավզերտ լեռան ստորոտում, մի բարձր լեռնադաշտի վրա գտնվող Թլակ գյուղի աղաջրերը, որոնք այս շրջանի բոլոր ավազաններից ամենահասունթաբերն էին և օգտագործվում էին թլակցի Չուխատար-գատենների կողմից, որպես սեփականություն: Պալապանի շրջանի գյուղերը մինչև Սանսայի կիրճը, Թլակից էին հայթայթում իրենց աղի պահանջը: Աղը փոխադրում էին մազե խուրջիներով, որոնք բեռնում էին էջերին կամ ջորիներին և կամ կրում շալակով, նայած գյուղի դիրքին և արահետի հարմարությանը: Մեծ-կերտի և Չարսանջակի աղի աղբյուրները և ավազանները պատկանում էին սիսանցիների աշիրեթապետ Հայտար աղային և իր եղբայր Հյուսեին բեկին: Այս աղբյուրների աղը օգտագործվում էր Դերսիմի այն գյուղերի կողմից, որոնք հեռու էին գտնվում աղաջրերի շրջանից: Շահագործող քուրդ աղաները ոչ մեկ սակ չէին վճարում կառավարությանը. ջուրը՝ բնական, հանքը՝ սեփական, արտադրի՝ ու վաճառի՝: Այսուհանդերձ, բոլոր աղահանքերից ամենակազմակերպվածն ու հասունթաբերը Կամախի աղաջրերի ավազաններն էին: Կամախի Դոմեր և Թըմսի գյուղերի ավելի քան վեց-հարյուր ավազանների կառույցի, կազմակերպության և վարչական աշխատանքների դասավորումը Ոսկան էֆ. Մարտիկյանի ստեղծագործական ոգու արդյունքն էր: Կամախի աղը մեծ հասույթ էր ապահովում պետությանը, բավարարելով ոչ միայն Կամախի շրջանի աղի պահանջը, այլև ուղարկվելով Ակն, Արաբկիր, Արմտան և մինչև Երզնկա:

Ուռում Սերայի մոտերքն էր գտնվում Սպիտակ մարմարի հանքը, որը գրեթե անօգտագործելի էր, սակայն հայտնի էր վաղեմի ժամանակներից՝ մի շարք մեհյանների քարերից կարելի է հետևանել, թե այս քարահանքը աշխատեցվել է: Որոշ մզկիթների ու բաղնիքների քարերը ևս այդ քարահանքից էին բերված:

ՀԱՆՔԱՅԻՆ ԶԻՆՐ: Դերսիմցին հանքային ջրերի բուժիչ հատկությունը վերագրում էր սրբերի կամ փրկների կարողությանը: Ամեն մի հանքային ջուր ուներ իր «սուրբը» (փրկը). օրինակ, Դերսիմից դեպի Կարին գնացող ճամփու վրա գտնվում էր մի մեծ հանքային ջուր, որը բխում էր Հեյլեն (Հեյլենք) գյուղի ստորոտից և դարմանում էր ամենա-

գարավոր իշյալը: Զուրը ժայթքում էր ժայռի միջից և ինքնաբերաբար լճանում: Այդանդ էր, որ հիվանդները լողանում էին և մինչև իրենց դարմանվելը բնակվում Հելլեն գյուղում:

Ոչ միայն Դերսիմի, այլ առհասարակ մոտավոր կամ հեռավոր շրջանների մեջ գոյություն չունեին կազմակերպված կամ կառուցված լոգարաններ, բոլոր հանքային ջրերը գտնվում էին բնական վիճակում, բացօթյա և անապաստան:

Մյուս «սուրբը», որ ամենադորավորն էր և ամենաջրառատը, հողացավի բժշկության ջուրն էր, որը գտնվում էր Բերկրիի ստորոտում, մի խորը ձորի մեջ: Շատ տաք էր և առատ, կարելի էր ձուլել խաշիլ: Օգտագործվում էր կա՛մ պատահական անցորդների և կա՛մ տեղացիների կողմից: Իր բուժիչ հատկությունը վերագրում էին հողացավի «սրբին», որը բնակություն էր հաստատել այդ ջրի մեջ և դարմանում էր իր զորությանը հավատացող հիվանդներին:

Բողվանքի ստորոտում գտնվող հանքային ջուրը շատ պաղ և դառնահամ էր: Օգտագործվում էր որպես լուծողական. մի բաժակը բավական էր, որ լուծեր ստամոքսի պնդությունը: Կոչվում էր նաև փորի ցավի և դողի աղբյուր: Դողցնողին (ջերմ) մերկացնում էին ու լողացնում աղբյուրի պաղ ջրով, և դարմանալիորեն ջերմը բուժվում էր:

Օսնակ գյուղի վերևը, ս. Կիրակոս վանքի ստորոտում գտնվող հանքային ջուրը հին դարերից մնացած մի ավազան էր, որին լիճ անունն էին տալիս: Հակառակ նրան, որ հողացավի և մեջքի ու թևերի դարմանումը տաք ջրերին էր վերագրվում, այստեղ սառը ջուրն էր, որ դարմանում էր նույնիսկ հնացած հիվանդությունը:

Ապուհայաթի մեծ ակը կենաց կամ անմահության ջուր էր կոչվում: Գտնվում է Ղըզըլքիլիսեի եկեղեցու պարտեզում: Գլխավոր հատկությունն այն էր, որ կերածդ արագ կերպով մարսեցնում էր: Սրա մոտ ապրողները և միշտ նույն ջուրը խմողները կշտանալ չգիտեին և առհասարակ հարյուր տարուց ավելի էին ապրում: Հստ քրդերի հավաստիացումների, Ապուհայաթը օգնում էր սեռնդագործության և սեռական հարաբերությունների ուժեղացմանը: Շատ տարիքավորներ միշտ ուխտի էին գնում այս եկեղեցին (որ կանգուն էր) և մատաղ մորթում անմահական այս աղբյուրի առջև ու օրերով մնում Ապուհայաթի ջուրը խմելու և երիտասարդանալու համար:

Սուրբ-լույս լեռան ձյունածածկ գագաթներից

վար, մի անանուն բերդի ավերակների ստորոտում Քանիի (քրդերեն՝ աղբյուր) անմահությունն էր: Հանքային այս ջուրն էլ Ղըզըլքիլիսեի աղբյուրի հատկություններն ուներ:

Մյուսը արձանագործ ակն էր: Այս ջուրը, որ գտնվում էր Պալապանի լեռների սրտի վրա թառած Խնձորեկ գյուղի արևմտյան կողմը, լեռնակա ձորը Բերդերի ձորին միանալու տեղից քիչ բարձր. տարօրինակ հատկություն ուներ՝ քանի դեռ գետնի մեջ էր և շփում շունքի օդի հետ, սովորական հեղուկ էր, ավելի ճիշտը՝ զլգլան պաղ աղբյուր, բայց հազիվ թե շփվում էր օդի հետ, գույնը փոխվում և աստիճանաբար քարանում էր: Ցերեկներն արևի շողերի տակ կարելի էր տեսնել այս փոքրիկ աղբյուրի հրաշագործությունները, նայած օդի հոսանքին, այն աջ ու ձախ քանդակներ էր կերտում, մի տեղ խաղողի մեծ ողկույզի ձև էր առնում, մի ուրիշ օր էլ՝ եղջերուի իրական կերպար, վերջապես ամեն օր նոր ձևի և նոր տեսակի ստեղծագործություն՝ մարդկային դիմանկար, կենդանական աշխարհի դանազան կերպարներ: Ամեն տուն առատորեն օգտագործում էր արձանագործ աղբյուրի կողմից բնականորեն կերտված դարձերը, որոնք նախնական շրջանում գաջի գույն էին ունենում, բայց ժամանակի ընթացքում անքան էին կարծրանում և գունափոխվում, որ մարմարի գույն և տոկունություն էին ստանում: Իր ակից մինչև ձորափը հազիվ 15 մետր բարձրություն ուներ, մարդիկ հաճախ կոտրում էին դեռ չկարծրացած քարերը կամ ծաղիկները և ճամփա բանում արձանագործ աղբյուրին, որպեսզի շարունակի ազատության մեջ ստեղծագործել:

Նույն գյուղի հյուսիս-արևելյան կողմից՝ Հայտարիի սարերից քիչ վար, մի ժայռի մեջտեղից դուրս էր ցայտում թթու աղբյուրի ջուրը, այնքան թթու, որ կարելի չէր խմել առանց պարզ ջրի խառնուրդի: Շաքարով խառնվելու պարագային կիտրոնով պատրաստված օշարակի համ էր ունենում: Ուներ մարսողական հատկություն և օգտագործվում էր փորացավի, աղիքների բորբոքման կամ լուծը դադարեցնելու համար: Զուրը բաց գեղին գույնի էր և դաղձի հոտ ուներ:

Նույն գյուղի արևմտյան կողմը, Բերգրա սարի ստորոտում էր գտնվում դառնահամ մի պաղ ջուր, կարելի չէր խմել, ծանր հոտ ուներ և շատ լեղի էր, և սակայն ջերմից տառապողների միակ ապավենն էր՝ հիվանդին մերկացնում էին և մերկ մարմնին թափում այս դառնահամ ջրից: Երեխան կամ մարդը, որ այդ ջրի լոգանքն առնելուց հետո դժվարու-

թյամբ մի երկու ումալ նույն ջրից խմում էր, արդեն թշկված էր լինում:

Եփրատ գետի աջ ափին, կենտրոնական խճուղուց 15—20 մետր հեռավորության վրա, թրքական Գալաոհիճ (Գալաոհիս) գյուղի ստորոտում էր գտնվում բորոտների բնականից ստեղծագործված անհատակ լիճը: Անհատակ անունն էր կրում, որովհետև շատ խորն էր և այնտեղ մտնող որևէ անասուն (ծի, գոմեշ կամ կով) կորչում էր անմիջապես: Լիճը փոքր էր, կենտրոնից գրկաչափ մի դեղին ջուր երկու մետրից ավելի վեր էր ցայտում ճիշտ արհեստական ցայտաղբյուրի նման, և սակայն ջուրը լճից դուրս չէր հոսում, մնում էր իր տեղն ու, հակառակ այդքան առատ ցայտմանը, ո՛չ ավելանում և ո՛չ էլ պակասում էր: Ձմեռվա սաստիկ ցրտերին լիճը չէր սառչում, ցայտաղբյուրը շարունակում էր նույն ձևով գլթգլթալ և գոլորշիանալ: Շատ զորավոր ժամաահանքային այս ջուրը, ասվում էր, ժամանակին օգտագործվել է բյուզանդացիների կողմից: Նրա զորավոր ժոռմբի հոտից խույս էին տալիս անասուններն ու թռչունները և սակայն նկատված էր, որ որսորդից խփված ու վիրավորված թռչուններն իրենք իրենց վերքը լվանում էին այս ջրով և դարմանվում: Քոստոած այծերը, բորոտած մարդիկ մի պարանով կախվում էին այս ավազանի մեջ մինչև վիզը, մնում մոտավորապես կես ժամ ու երբ դուրս էին հանվում ջրից, մարմինը դեղնած, բայց վերքի կոշկոռները թափված ու հիվանդությունը դարմանված էր արդեն:

Մնձուր լեռան ստորոտում գտնվող, ճանճիկե գյուղի մոտից անցնող Գոմու-ջուրը ավելի առատ էր և ավելի ուշ էր քարանում, քան վերը նշված արձանագործ աղբյուրը: Սա արձաններ չէր ստեղծում և չէր քարանում, երբ հոսում էր, սակայն երբ այն լցնում էին ավազանների մեջ, արևի ճառագայթների ազդեցության տակ շոգիանում էր և ավազանների հատակին մնում էին 50—60 սմ հաստությամբ քարասալեր, որոնք սկզբնական շրջանում շատ կակուղ էին լինում ու կարելի էր սղոցել, տաշել և ամեն տեսակ փորագրություններ կատարել, իսկ հետո, ժամանակի ընթացքում, այնքան կարծրանում էին, որ դժվարությամբ էին տաշվում: Մաթգեղի եկեղեցին իր բոլոր զարդարանքներով այս ջրաքարից էր կառուցված և հարյուրավոր տարիներ ի վեր պահպանում էր իր գոյությունը:

Թվարկած հանքաջրերի մեջ ամենամեծը և ամենաշրառատը Թթու ջուրն էր, որին տեղացիք Պեոկերտ անունն էին տալիս: Այս ջուրը դարեր

առաջ օգտագործվել էր հոռմեացիների կողմից: Ջրի ակը գտնվում էր Ճիմին (Ճեմբիմ) թրքական գյուղի ստորոտում, շատ թթու էր, խմելու ժամանակ ծծումբի զորավոր հոտ էր առնվում: Մի բաժակ կարելի էր խմել ուղղակի ակից, շատ մարսողական էր: Ամռանը առանձին մարդիկ լսվ խցանված շշերով Երզնկա էին տանում և որպես զորավոր սողա՝ վաճառում:

Չափավոր տաք ջրի երկու ակունք կար, առաջինը՝ Չագրման գյուղի ստորոտում, երկրորդը՝ Գալաոհիճի (Գալաոհիս) մոտերը: Հանքային այս ջրերի վրա կառուցված բաղնիսների հետքեր կային: Ժամանակին, դարեր առաջ, հանքային այս ջրերը օգտագործվել են, որովհետև այստեղ ու այնտեղ թաղված քարերի վրա մի քանի կտոր արձանագրություն կար, ծաղկազարդված գրերի նման, բայց անհասկանալի: Վենետիկցի Մարկո-Պոլոյի վկայությամբ ԺԳ դարուն ամենատաք ջերմուկային բաղնիսները գտնվելիս են եղել վերը նշված հանքաջրերի տեղը: Գալաոհիճի ստորոտը գտնվող իլիճեն ջերմուկի ջուրն ուներ մեծ ավազան, առանց պատի և ծածկի, անխնամ, ջուրը ֆոսֆորային էր:

Դերսիմի հանքային ջրերը հազարների էին հասնում և հնարավոր չէ բոլորը թվարկել: Ընդհանուր առմամբ Տուժիկ-պապայից մինչև Կամախի Չարաախլի լեռները և Քղիի Կարմիր լեռան գագաթներից մինչև Սեպուհ լեռան ծերպերը ամեն տեսակ հանքերի և հանքային ջրերի շտեմարաններ կային: Այսպես, Չագրմանի տաք ջրի մոտից մինչև Քյարթաղ (Քարթաղ) շատ կարճ տարածության վրա, մեկը մյուսին հակոտնյա բնութով և հատկություններով հարյուրավոր հանքային ջրերի աղբյուրներ կային: Մարդ զարմանում էր, երբ շատ տաք ջրի ակից տասը քայլ հեռավորության վրա հանդիպում էր շատ սառնորակ մի ակի: Մի տեղ պաղ, քովը տաք, մի տեղ աղի, մոտը լեղի կամ թթու, մեկը՝ հանդարտ հոսող, երկրորդը՝ ցայտաղբյուրի նման վեր ժայթքող, երրորդը՝ մի ժայռի կրծքից դուրս պոռթկող:

Շատ տարօրինակ մի հանքային շրջան, նույնքան և հետաքրքիր, գտնվում էր Եփրատ գետի վրա ձգված Մըթիի կամուրջի դիմացը, իսկի աղայի խանի և Չորբերնա խանի շրջանի միջև ընկած տարածության վրա: Կենտրոնական ճամփու ստորոտում գտնվող այդ հողամասին կարելի էր տալ հանքաճահիճ անունը, որովհետև ամբողջ տարածությունը հանքաղբյուրների ակերով էր ծածկված: Ճամփորդը գեո կես ժամ հեռվից հասկանում էր, որ մոտեցած է հոտերի սահմանին:

Քարյուղի, ծծումբի և մեղ անծանոթ այլ հոտերի ազդեցությունը բռնած էր ամբողջ տարածությունը, մարդ կարող էր մտածել, թե եթե մի օր դատապարտված լինի ապրել ու շնչել այդ զորավոր հոտերը, հավանաբար շնահեղձ կլինի, որովհետև գազային արտաշնչումի այդ շրջանում տեղ կար, ուր աչքերը կարցունքոտվեին, տեղ-տեղ էլ մարդ հարկադրաբար կփռնքտար և կամ թաշկինակով բերանը կփակեր, որ շնչեր ու շահարժ Իրար հակամետ այդ հանքաշերտի ազդու հոտի պատճառով մարդ չէր համարձակվում մոտենալ ակերի շրջանին, շտապում էր արագ անցնելու հոտած այդ շրջանից, որին թուրքերը խոխուշար անունն էին ավել:

ԱՄՐՈՑՆԵՐ: Դերսիմում կային պատմական արժեք ներկայացնող հնագույն մի շարք բերդերի ու ամրոցների ավերակներ, ինչպես նաև կանգուն կոթողներ, որոնցից նշանավոր էր հատկապես Երզնկայի բերդը, որը մինչև վերջերս էլ թուրքական շորրորդ բանակի կողմից օգտագործվում էր որպես զորանոց և զինարան: Այս բերդը գտնվում էր քաղաքից արևելք, Կարինի ճանապարհին և ժամանակին քաղաքի պաշտպանության գլխավոր ամրոցն էր եղել:

Բերդը կառուցված էր կոփածո քարերով: Քարուկիր (քեվկիր) հիմքերը շատ խոր էին, շրջափակված էր երեք մեծ պարսպով, որոնց բարձրությունը մոտ 30, իսկ լայնքը՝ վեցից ութ ոտք էր: Արտաքին պարիսպը դրսի կողմից պաշտպանված էր լայն ու խոր խրամներով, ուր հատուկ ջրմուղներից հորդառատ ջուրը լցվում էր խրամների մեջ, որով ամրոցը կղզիանում ու դառնում էր անմատչելի: Պարիսպների վրա, տասնական քայլ հեռավորությամբ, կառուցված էին բուրդեր ու մարտկոցներ: Աշտարակները քայքայված էին, բայց պարիսպները մնում էին կանգուն: Բերդն ուներ հաստ երկաթներով ամրացված մեծ դուռ, որի աջ և ձախ կողմի աշտարակները ևս կանգուն էին: Դուռն վերևը զետեղված էր մի մեծ թնդանոթ, որը օգտագործվում էր ծոմապահության (ռամազան), բայրամի ժամանակ և կամ տարբեր ուրախառիթ լուրեր ամբողջ քաղաքին ծանուցելու համար:

Պարիսպների շրջափակոցի ներսը կատարյալ բերդաքաղաքի նման էր՝ մարզանքի, փորձերի հատուկ հրապարակներ, զինվորական արհեստանոցներ, պահեստանոցներ և զորանոցներ էին տեղավորված այդտեղ:

Բերդի շինության մասին որևէ արձանագրություն չկար, միայն թե XIV դարի աշխարհագիր

Մուսթաֆյուն վկայում է, թե այն կառուցվել է Իկոնիայի Ալայետդին Քեյուպատ սուլթանի կողմից, սակայն չի նշում թվականը:

Մյուս բերդը գտնվում էր Երզնկայի արևելյան կողմը: Սանսայի կիրճի ուղղությամբ դեպի Դերսիմ նայող և Երզնկա-Կարին խճուղին իր պաշտպանության տակ պահող Բերդաբ (Բերդեր) լեռան մեջ, ինձորեկի հին գյուղատեղից մի ժամ, նորից հազիվ քսան ռոպե հեռու: Ամբողջ լեռը փորված և այդ ընդարձակ պարապետության մեջ բերդեր էին շինված: Լեռը ամբողջությամբ դատարկ լինելու ապացույցն այն էր, որ լեռան որևէ մասում գեանին հարվածելիս թնդյուն էր ելնում, որպես արձագանք ընդերքի դատարկության:

Բերդի կամ բերդերի դուռը գտնվում էր նույն լեռան արևմտյան կողմը, Բերդաբ ձորի վրա: Այս մասին գրավոր միակ տեղեկությունը գտնվում էր հայտնի հասարակական գործիչ, ինձորեկ գյուղացի Միլլեթպաշի խաչիկ աղայի (խաչիկ Մինասյան) մոտ պահվող մի ավանդական արձանագրության մեջ, ըստ որի, ժամանակին, երկրաշարժի և կամ լեռնային տեղաշարժի հետևանքով, հանդիպակաց Սևբարի լեռներից մի լեռնաշերտ է պոկվել և ընկել բերդի վրա, փակելով նրա ելքի ու մուտքի անցքերը: Իսկ մեծ պապիս պապը՝ Թորեկը, մի ձեռագիր աղոթագրքի կողին արձանագրել էր մի այլ ավանդություն՝ իբր թե բերդի զանազան բաժանումների մեջ պահված են հսկայական գանձեր և մագաղաթե հիշատակարաններ:

Դերջանի Դիվնիկ հայաբնակ և Պալապանի Զուրեն (Սուրեն) քրդաբնակ գյուղերի միջև, Սպիտակ քարերի ու ամառանոցների արևելյան կողմը, Կեիկ-կոլ լճի վրա բարձրանում էր Մլքեբդը (Մեքեբդ), ծովի մակերեսից մոտ 3000 մետր բարձրության վրա: Դրսից դիտողին թվում էր, թե դա անմատչելի ապառաժների մի ժայռակույտ է:

Բերդը իշխում էր՝ արևելքից Դերջանի, հարավից Սանսայի կիրճերին, արևմուտքից Կարինի խճուղուն, իսկ հյուսիսից Պալապանի և Գուրեշանի լեռնաշարերին: Կառուցված լինելով լեռնագագաթներից պաշտպանված և լեռնադաշտի ճիշտ մեջտեղից վեր բարձրացող ամենաբարձր գագաթի վրա, բնականորեն գերիշխող դիրք էր գրավել: Ոչ ոքի մտքից չէր անցնում մոտենալ վայրի գազանների այդ որջին և ոչ էլ մտածել, թե ժամանակին այդտեղ մեծ բերդ է եղել: Մինչդեռ լայնանիւտ պարիսպների փլատակները, աշտարակների կիսաքանդ մնացորդները և կիսակործան ամրությունները, բոլորն էլ շինված, տաշված և

հղկված մեծ քարերով, արահետները, ստորերկրյա ներքնուղիների հայտարար նշանները, որոնք ժամանակի ընթացքին լցվել էին քարով և ավաղով, կասկածի տեղ չէին թողնում:

Երբ և ում կողմից է կառուցվել այս բերդը, կամ երբ և ում կողմից կործանվել, ոչ ոք չգիտեր: Նույնիսկ շատերին անծանոթ էր բերդի գոյությունը:

Քղիից հյուսիս-արևելք, դեպի Կարին նայող Կարմիր լեռան անմատչելի ծերպերին էր թառած կիսակործան Կաւմիւր բերդը (Ղըզըլ-դաւե), որն իշխում էր Դերսիմի հյուսիս-արևելյան շրջանին: Սրա ավերակների տեղանքից և մնացորդներից կարելի էր հետևել, թե ժամանակին մեծ և զորավոր մի բերդ է եղել: Արտաքին պարսպի պատերը շատ լայն էին, տեղ-տեղ աշտարակների հիմքերը մնացել էին անվթար:

Ավանդաբար պատմվում էր, թե այս բերդը ստորերկրյա ուղիներով հաղորդակցության մեջ է եղել մոտակա վանքերի և գյուղերի հետ:

Քղիից հարավ-արևելք, Միանձում լեռան վրա, քարայրից դեպի աջ ընկած բարձունքին էին գտնվում Ապառ բերդաֆաղաֆի ավերակները: Այս բերդաքաղաքը ճանաչված էր որպես Դերսիմի արևելյան պաշտպանության ամրոց: Սրա երբեմնի հզորության վկաներն էին բերդի հաղորդակցության միջոցները, ստորերկրյա գետնուղիները (որոնցով կապ էին պահել Աստղաբերդի հետ), ջրմուղները, եկեղեցիների և ամրոցների փլատակները:

Ավանդաբար պատմվում էր, թե Ապառը համառ դիմադրություն է ցույց տվել բյուզանդացիների արշավանքներին և Մանանաղիքը պաշարած թշնամուն:

Ապառն ուներ մի մեծ գերեզմանոց, առատ ջուր, խիտ անտառներ և անմատչելի դիրք:

Աստղաբերդ գյուղի և Աստղաբերդ լեռան անտառածածկ լեռնազաշտի գեղատեսիլ բարձունքին, ճիշտ ս. Կիրակոս վանքի ստորոտում էին գտնվում Աստղաբերդի ավերակները:

Աստղաբերդը ժամանակին Դերսիմի արևելյան կողմի պաշտպանության պատենն է եղել: Ավերակների մնացորդները՝ պարսպի լայնքն ու երկայնքը, պատերի հաստությունը, պաշտպանական ամրոցների դիրքը և Ապառի հետ ունեցած հաղորդակցության միջոցները գալիս էին վկայելու, թե այս բերդն էլ մյուսների կարգին աչքառու դեր է խաղացել ինքնապաշտպանության պարագաներում:

Աստղաբերդի վերևից հոսող Օրորի ջրի հանկարծակի անհետանալը տեղացիները ավանդաբար վերագրում էին վիշապին՝ իբր թե վիշապն է, որ ջրի հոսանքը խափանել և ուղղությունը փոխել է: Մինչդեռ ջուրը մի մեծ քարի տեղաշարժումով աննշմարելի մի ջրանցքից դեպի ստորերկրյա ջրամբարներն էր հոսում ու, երբ բերդին պետք եղած ջրի պաշարը լրացվում էր, նույն քարը, որի վրա Աժդահայի կերպարը ցույց տվող մի փոքր վածք կար, դարձյալ իր տեղն էր գալիս և աղոթքների կամ մատաղների շնորհիվ Աժդահայից ազատագրված Օրորի ջուրը նույն ընթացքով շարունակում էր իր ճամփան: Գաղտնիք էր մնում այն, թե ինչ միջոցներով և ինչ ուժի գործադրությամբ էին այդ քարը շարժել, ուստի քարի շարժը վերագրել են ջրերին գերիշխող Աժդահայի զորությանը: Նույն վիշապն է, որ ոչխարների հոտի, կթվորների ու հովիվների հետ միասին բերդի ավերակներից հետո քարացել է Վիշապասարի ժայռերի վրա և այդ թվականից ի վեր Օրորը չի փոխել իր ընթացքը:

Հեթանոսական շրջանից սկսած, Հայաստանի իրական թե ավանդական պատմության մեջ իր համբավն ու պատվավոր տեղն է ունեցել Դերսիմից հյուսիս-արևմուտք, Երզնկայից արևմուտք, Սերովբե լեռան անմատչելի ապառաժների հովանավորության և պաշտպանության տակ գտնվող Ամուր բերդը կամ Անի ամրացը, որի ավերակներն էին մնացել միայն: Թեև կործանված, բայց այն պահում էր իր պատմական արժեքը: Հայ հին մատենագրության մեջ թեև կան դրա վերաբերյալ մասնակի տեղեկություններ, բայց զգալի տարբար այն հնագիտորեն զեռևս ուսումնասիրված չէ:

Ջանց առնելով սրան վերաբերող գրավոր տեղեկությունները¹, որոնք մատչելի են հետաքրքրվողին, ներկայացնում եմ իմ տեսածի նկարագիրը:

Իփրատի ափին, Կամախ (Քյամախ) քաղաքից վերև, ուղղահայաց կտրվածքով անմատչելի ժայռին էր բազմած ամրոցը:

Ծիտելիների ձորի արևելյան բարձունքի լեռնազաշտում էր գտնվում ս. Նիկողոսի ուխտատեղին, մինչև ուր վերելքը համեմատաբար դյուրին էր, բայց ուխտատեղիից վեր սկսվում էր թեք ապառաժների շարքը: Առաջին և երկրորդ ապառաժ-

¹ Լեռ, Հայոց պատմություն, Թիֆլիս, 1917, հատ. Ա, էջ 171, Մովսես Խորենացի, Հայոց պատմություն, Թիֆլիս, 1913, գիրք Բ, էջ 145, 151, 163 (աշխարհարար):

ներից հետո գալիս էր մի փոքր հարթություն, ապա սկսվում էր սանդուղքը, որն ուներ վեց հազար չորս հարյուր աստիճան: Աստիճանների բարերը միաշափ ու միակտուր էին, սակայն դարերի ընթացքում անձրևներից ծեծված, խճաքարերով ծածկված, տեղ-տեղ նույնիսկ աննշմարելի դարձած:

Սանդուղքի աստիճանների վերջություն, դեռ լեռան գագաթը չհասած, կար մի մեծ ալրի մուտք, մարդահասակի չափ բարձր ու շատ լայն: Մուտքի դռան աջ կողմը կանգնած էր սպիտակ մարմարից կերտված մի հսկա առյուծի արձան, որը նայում էր դեպի արևելք, իսկ դռան ձախ կողմը, միակտուր բուրբակ բարձր սյունի նման, մի կոթողի վրա, կոնակ-կոնակի քանդակված էր յոթ գեղեցկուհու արձան՝ տարբեր ձևերով և տարբեր դիմագծերով: Ալրի մուտքը, որ գտնվում էր երկու արևանների մեջտեղը, ուղղված էր դեպի արևմուտք:

Քարայրը փորված էր միակտուր ժայռի մեջ, որը ձգվում էր մերթ դեպի աջ, մերթ դեպի ձախ, բայց միշտ դեպի արևմուտք, տեղ-տեղ դրսից հաղիվ նշմարելի լուսանցքերով, բայց ներսից երկար և լայն բացվածքներով:

Բավական խորանալուց հետո ի հայտ էին գալիս նոր անցքեր ու նորանոր այրեր, մեկը մյուսի հետ կապված ուղիներով, մի տեղ՝ լայն ու երկար սրահ, մի ուրիշ տեղ էլ՝ դեպի խորը իջնող սանդուղքներ: Շարունակելով իջնել կենտրոնական գետնուղու քարից շինված աստիճաններից և միշտ հանդիպելով մեծ կամ փոքր մուտքի դռների ու առանց շեղվելու կենտրոնական ուղուց, երկու ժամում կարելի էր հասնել Ամուր բերդի այն մեծ անցքին, ուր վերջանում էր կենտրոնական գետնուղին:

Անցքի բացվածքից տեսնվում էին հանդիպակաց քարայրների ծակերը. վերը՝ երկինքը, վարը՝ աղմկահույզ Ծփրատը: Մինչև ելքի սույն դուռը փորված գետնուղին գտնվում էր Ծփրատի ձախ ափին, Դերսիմի թիկունքի ուղղությամբ:

Ելքի դռան աջ կողմը, հինգից-վեց մետր խորությամբ վրա, մթության մեջ մի նոր դուռ էր բացվում, որը դրսից նշմարելի չէր: Սա նոր գետնուղի էր, որը համաշափ սանդուղքների աստիճաններով իջնում էր դեպի վար, դեպի ապառաժի ընդերքը: Պետք էր իջնել վար, խորանալ մինչև հասնելը սենյակի մեծությամբ մի կլոր հարթության, որտեղ վերջանում էր վտանգավոր վայրէջքը: Այստեղ գետնուղին բաժանվում էր երկու մասի, առաջինը վայրէջքի գետնուղու շարունակությամբ

էր, երբեք բարձրանում էր, իսկ երկրորդը դեպի արևելք երկարող մի նոր դուռ էր՝ լայն և ուղիղ:

Առանց շեղվելու կենտրոնական վերելքի ճամփից ի առանց կանգ առնելու որևէ բացվածքի առջև, ուղին հասնում էր վերելքի վերջույթի մոտ, դեպի աջ բացված մի նոր դռան, ուր գտնվում էր ընդարձակ մի սրահ՝ զանազան բաժանումներով:

Կենտրոնական գետնուղուց վեր, ճիշտ հանդիպակաց ժայռերի մեջ, վերը նկարագրված դռան դիմացը, ապառաժի մեջտեղը, Ծփրատի մյուս ափին Ամուր բերդն էր: Վայրէջքը շարունակելով եկած ուղիով և վերադառնալով արդեն մինչև այգ անցած սենյակը, պետք էր անցնել դեպի արևելք երկարող գետնուղով, որն առանց սանդուղքի էր: Այստեղ էլ զանազան ուղղությամբ փորված էին այրեր, պահեստի տեղեր, թաքստոցներ, բնակության համար սենյակներ:

Այսպիսով, Ծփրատի տակից մերթ աջ, մերթ ձախ թեքվելով և մոտավորապես երեք ժամ քայլելուց հետո, գետնուղին թեքվում էր դեպի աջ և կրկին սանդուղքների օգնությամբ բարձրանում վեր, դեպի հարավ-արևմուտք, բայց ոչ շատ թեք: Բավական ճամփա անցնելուց հետո, ուղին անսպասելիորեն անցնում էր Կամախի կիրճի վերը, բարձր ապառաժների ստորոտը, ճիշտ կիրճի մուտքի և Երզնկայի հովտի բերանը:

Ահա սրանք էին Անի ամրոցը և Ամուր (կամ Գառնի) բերդը, որոնք ամբողջովին վիմափոր (ժայռափոր) էին:

Սեպուհ կամ Դոհանամ կոչված և հայերի կողմից որպես սուրբ լեռ ճանաչված մի դագաթի ստորոտում էին գտնվում Տրդատի բերդի ավերակները: Սրա կառուցման և կործանման ժամանակների մասին տեղեկություններ չկան:

Տրդատաբերդի ավերակների ծավալը, կառուցման համար գործածված սրբատաշ քարերի մեծությամբ և բերդի իշխող դիրքը վկայում են, թե մինչև Ամուր բերդի տարածությունը պաշտպանելու սահմանված այս ամրոցը ժամանակին ինքնապաշտպանության մի ուժեղ պատվար է եղել: Անուղղակի կարելի է ենթադրել նաև, որ այս շրջանը հին ժամանակներում հայաբնակ մեծ ավաններ է ունեցել, որոնց պաշտպանության համար էլ բերդը կառուցվել է: Բերդի ավերակների տակ կար մի գետնուղի, որը մխրճվում էր լեռան սիրտը և սակայն կարելի էր խորանալ՝ օդի ճնշումը և մարդու շնչառությունը կանգնեցնող մի կծու հոտ հարկադրում էր ետ դառնալ:

Արածանիի աջափնյա շրջանում Դերսիմի սահմանագծման առաջին ամրության գոտին

նկատվում էր Բերդակ գյուղի մոտ, Թիլի արևմտյան և Սավալի արևելյան կողմը գտնվող Բերդակ բերդը:

Համանուն գյուղը գտնվում էր երեք կողմից անմատչելի ապառաժների վրա թառած բերդի ստորոտում:

Բերդը, որ դեռևս կանգուն էր, իշխում էր Արածանիի հոսանքի և արևելյան ու արևմտյան շրջանների գյուղերի վրա: Բերդ կարելի էր բարձրանալ միայն հյուսիսային կողմից, մի բարձունքի միջոցով:

Քրդերի մեջ ավանդաբար պատմվում էր, թե թրքական բանակը առաջին անգամ երբ Կարինը գրավելու համար խարբերդից ճամփա ելած և Արածանիի ուղղությամբ ավելի կարճ ուղիով Բերդակ է հասած, ցույց տրված ընդդիմության պատճառով, ստիպվել է կովի բռնվելու բերդապահների հետ, որոնք լեռնային շրջաններից իջնող աշիրեթների օգնությամբ պաշարել են թրքական բանակը և բնաջնջել: Ասվում էր նույնպես, թե Տիգրանակերտ-խարբերդ-Բերդակ-Ճապաղ-ջուր-Կարին ամենակարճ ճանապարհը, այդ դիմադրությունից և բանակի բնաջնջումից ի վեր, անօգտադրժելի է մնացել:

Բերդի կառուցման ժամանակի մասին տեղեկությունները պակասում են:

Բերդն ունեցել է ստորերկրյա ճամփաներ, գետնուղիներ (որոնց միջոցով հաղորդակցության կապը պահվում էր թիկունքի հետ) և շտեմարաններ:

Բերդի արևելյան կողմը գտնվում էին արհեստական բլուրներ, որոնց Հողդար անունն էր տրվել: Ըստ տեղացիների, այդ բլուրների տակ գերեզմաններ կային:

Բոլոմորիի արևմտյան կողմը, դեպի Օվաճգ տանող ճամփի վրա, դեռ Քութու-տերեսիի կիրճը չհասած, բարձր ապառաժների խորքում գտնվում էին մի բերդի ավերակները, որին բնիկները Բալուր-Մուրիի բերդ էին անվանում:

Բոլոր-Մորին իր անունն առել էր տեղական պայմաններից: Թե բերդը և թե Բոլոմորի գյուղաքաղաքը գտնվում էին անտառների մեջ և որովհետև տեղական բարբառով անտառին մուրի անունն էին տալիս, ենթադրվում է, թե Բոլոմորին էլ իր անունն ստացել է ճրուրը մորիս-ից:

ՎԱՆՔԵՐ: Ճաֆեր-պապ լեռան և Աստղաբերդի միջև ճիշտ բերդի բարձունքին, լեռնահովտի կենտրոնում էին գտնվում ս. Կիրակոսի վանքի փլատակները:

Պարսպապատ և մեկից ավելի եկեղեցիներ ունեցող այս վանքը ժամանակին ուսումնարան է եղել: Մայր եկեղեցու կիսակործան գմբեթը, լայն և ընդարձակածավալ գավիթը, աբեղաների խցիկները, մառանների, պահեստների հսկա շարքը հիմքն էին վանքի հարստության և կուլտուրական մի օջախ լինելու մասին եղած ավանդության: Ըստ շատերի վկայության, վանքն ունեցել է եղջերավոր անասունների մեծ հոտեր ու նախիրներ, ազնվացեղ ձիերի ու ջորիների երամակներ և բազմաթիվ փեթակներ: Եվ արդեն վանքի բնական դիրքը, վարելահողերի ծավալը, մշակված պարտեզների վայրը, գլխաւ առվակների ու բազմաթիվ աղբյուրների ներկայությունը, միացած լայնատարած արոտավայրերի և անտառածածկ լեռների իրական և բնական պատկերին, գլխավոր ապացույցներն էին հաստատելու համար վանքի նախկին շեն և փարթամ վիճակի մասին խոսվածքները:

Բացի տնտեսական հարստությունից, վանքն ունեցել է գրքերի և ձեռագրերի մեծ պահեստներ: Զեռագրերի մի մասը գտնվում էր Մամգանցիների աշիրեթի կրոնապետ օնիդ Իւրահիմի որդու՝ Ռզայի մոտ:

Այս շրջանի ամենաբարձր դիրք ունեցող վանքը Կեիկ-տաղի երկրորդ գագաթի ստորոտում, Արմտիք գյուղի արևելյան և Գոմերի արևմտյան կողմը լայնածավալ մի լեռնադաշտի վրա կառուցված ու Կարապետի վանքն էր (չշփոթել Մշո Սուլթան ս. Կարապետի և կամ Դերսիմի Հավորի ս. Կարապետ վանքի հետ): Սա ևս ժամանակին ունեցել է բեղմնավոր կյանք: Այստեղ նույնպես կային մշակելի հողատարածություններ, առատ ջրեր, անտառածածկ լեռներ և ընդարձակածավալ արոտատեղեր:

Ասվում էր, թե այս վանքն էլ, ս. Կիրակոսի նման, ունեցել է վանականներ և աբեղաներ, հարուստ անցյալ:

Դավթի սարի և Միանձում լեռան միջև, մի լայն սարահարթում էր գտնվում քարաշեն և պա-

¹ 1914 թ. գարնանը անձամբ հյուր եմ եղել կրոնապետ օնիդ Ռզայի՝ ալեվիների եպիսկոպոսի մոտ և մեծ դժվարությամբ տեսել եմ մի շարք ձեռագիր ավետարաններ, գրչագիր մագաղաթներ, որոնց կարգին մի ձեռագիր օրինակ Մովսես Խորենացու «Հայոց պատմությունից»: Խոսակցության ընթացքում պարզվեց, որ ձեռագրերը վերցրել են նրանց նախնիները ս. Կիրակոս վանքից, որ պաշտոնավարել են և իրենցը նկատում էին դրանք, սակայն առանց հասկանալու լեզուն և կարենալ կարդալու:

ըրեսպապատ Դավթա վաճճը, որի կիսակործան խորանի կառույցը, վե՛մ քարերի փորագրութիւնները և վանականների ու ուխտավորների սենյականների փլատակները որոշ բան ասում էին դոս երբեմնի նշանակութեան մասին:

Վանքն ուներ մի մեծ գերեզմանատուն տառապանքաբերով, որոնցից մի քանիսը դեռ պահում էին արձանագրութեանց հետքերը:

Ամեն տարի աշնանը, կալերի ավարտումից հետո, Դերսիմի ամեն կողմից եկող հայ և բուրդ ուխտավորները մասամբ վերակենդանացում էին անցյալի հիշատակներն ու եղբայրական սիրով ու խանդավառութեամբ տոնում վանքի օրը:

Հայ կղերի ներկայութեան պարագային, քուրդ ռեյսիւրը, սեիդը և կամ փիւրը մատաղի աղի օրհնութիւնը հայ կրօնավորին էին զիջում:

Միանձում լեռան բարձրավանդակի հարավային կողմը, մի մեծ քարանձավի ստորոտում, դալարագեղ և անտառածածկ սարահարթում, երկու ձորակների միացման տեղը կառուցված էր նախկին Միանձում վաճճը, որի փլատակներն էին մնում:

Միանձումի քարայրից կաթող ջուրը ականջի ցավի բժշկութեան գեղ էր նկատվում, այնպես որ բացի աշնան ուխտագնացութեան օրից, տարվա բոլոր եղանակներին ուխտավորները և մատաղները անպակաս էին: Ականջի ցավ ունեցող հայ թե քուրդ հավատացյալները դիմում էին ս. Միանձումի հրաշագործութեանը:

Առեք գյուղի արևելյան կողմը, երեք գագաթների ստորոտի մի լայն լեռնադաշտում էին գտնվում ս. Աստվածածնի վաճճի փլատակները:

Վանքի շրջակա լեռները ծածկված էին պտղատու ծառերի անտառներով, կային մշակելի հողերի լայնատարած դաշտեր, արոտատեղեր, առատ ջուր և մաքուր օդ:

Այդ վանքը ևս ունեցել է բեղմնավոր կյանք: Մնում էին վանքի ստորգետնյա կաթնատար «փորդանք»-ները (հողե խողովակներ), որոնցով փոքր ավազանի մեջ լցված կաթը վանքի գոմերից հոսել է մինչև Փականք գյուղը, ուր և մշակվել է: Կաթի առաքումն ավարտելուց հետո, նույն խողովակներով վանքի ստորոտից բխող պաղ աղբյուրի առատ ջուրն է հոսել գյուղ:

Վանքի եկեղեցին և գավիթը թեև կիսակործան, պահում էին հայ հին ճարտարապետութեան դրոշմը: Վանքն ունեցել է մեծ գրապահաստ հին մագաղաթներով: Զեռագրերի մի մասը գտնվում էր Պամասուրանների կրօնապետ ճափերանցի

սեիդ Ալիի որդի սեիդ Սուլեյմանի մոտ, որը ժառանգաբար պահում էր այն, որպես քրդերեն գրքեր:

Տուփիկ-պապայի անմիջական պաշտպանութեան տակ, Մալ լեռան արևմտյան կողմը, Զմըշ-կածսգի, Բերկրիի և Բալուի միջև, Դաշտակ գյուղի վերևը, խիտ անտառոտ սարահարթում վեհափառորեն բազմած էր Հալվուրի ս. Կառապետ վանքը: Սա, որ Դերսիմի ամենամեծ վանքերից մեկն էր նկատվում, ամբողջ շրջանի կողմից ճանաչված էր «Սուրբ Հրաշագործ» անվամբ: Շատ հարուստ էր իր հնութիւններով, մասունքներով, եկեղեցական թանկագին սպասներով և ձեռագրերով ու մանավանդ հրաշագործութեան ավանդութիւններով: Ըստ տեղեկութիւնների, այս վանքը մինչև 1938 թ. կանգուն էր:

Արսենիկի ստորոտում, եղրեանի վերևի ձորաբերանի հորձանքում էր գտնվում Բոզ վաճճը (կամ Բոզավանք): Ասվում էր, թե ժամանակին կոչվել է Բյուզանդավանք:

Վանքը ժամանակին ունեցել է բեղմնավոր կյանք, պարտեղներ, վարելահողեր ու արոտատեղեր: Տեղ-տեղ կանգուն մնացել էին պարսպի մասնիկները, խորանի մի մասը, գավթի դռան մոտ ընկած էին ծաղկազարդված մեծ խաչքարեր:

Քղիի հյուսիսային կողմը, Առինձ գյուղի վերևի ձորամիջում, գեղատեսիլ լեռնալանջին էին գտնվում Ամենափրկիչ (Փրկչա) վաճճի ավերակները: Այս էլ մյուսների նման ունեցել է հարուստ կալվածքներ: Թեև ավերակ, բայց կարևոր ուխտատեղի էր շրջանի հայ և քուրդ բնակչութեան համար:

Դերսիմի կենտրոնից դեպի խոզաթ տանող ճամփու վրա, Սին գյուղի և խոզաթի միջև ընկած Դաշտակ գյուղի բարձրավանդակում էին գտնվում Դաշտակա վաճճի ավերակները:

Վանքի աջ կողմը կային վարելահողեր, թիկունքին՝ անտառ և արոտավայրեր, ձախ կողմը՝ պարտեղներ, առատ ջուր և բուսականութիւն:

Մի մեծ սրբատաշ քար, որ կիսով թաղված էր հողի մեջ, կրում էր հետևյալ արձանագրութիւնը՝ Ճ. Կ. Բ.:

Պաղը լեռան արևմտյան կողմը, բարձրագիւր խնձոր գյուղի վերևում, Հերտիֆ գյուղի հարավ-արևմտյան կողմն էին գտնվում Գաւրգան (Գե-որգան) վաճճի ավերակները:

¹ Գեւ, քրդերեն նշանակում է խալ (Գեւրգան՝ խողովակ սուրբ):

Այս վանքը խուլերի բժշկության սրբատեղին էր և դերսիմցիների պաշտամունքի օջախը: Տարվա մեջ մի քանի անգամ ամեն կողմից ուխտավորներ էին գալիս այստեղ և մատաղ մորթում:

Վանքը կառուցված էր 1152 թվականին: Հայերից ոմանք այն կոչում էին Գուրգենավանք, իսկ Հերտիֆում բնակվող Միրագյան տան շահա՝ վիդներից Ակո Սեմ Միրագի աղան բացատրեց, թե սխալ է և՛ մեկ, և՛ մյուս անվանումը: Ծիշտ կլինի ասել Գալաղյաց (կամ Գալաղիք) վանք: Ըստ նրա, իր մեծ հոր պապը վանահայր է եղել և նա ճշտել ու հաստատել է վանքի հիմնադրման թվականը, որն արձանագրված է եղել աղոթագրքի կողին՝ «հազար սե բանճաս ու տըտե»² (1152 թ.):

Վանքի ավերակների մեջ կային տապանաքարեր, որոնցից մեկի վրա քանդակված էր պատարագիչ եպիսկոպոսի պատկերը, որն ուներ 12 ոտք երկարություն:

Դերջանի արևմտյան կողմը, Մլբերդ լեռան ստորոտում, Զուրեն քրդաբնակ գյուղի մոտի ձորերի կապույտ լեռան ու Զավակատուր (Օղլանվերեն) ժայռերի ճիշտ մեջտեղն էր գտնվում ս. Թուրսի վանքը, նշանավոր իր ավանդություններով և մասունքներով:

Քարաշեն ու պարսպապատ էր, եղել էր Դերջանի շրջանի առաջնորդանիստ վանքը, կառուցված Տրդատ թագավորի ձեռամբ³:

Վանքը թեև հարուստ չէր, բայց իր գոյությունը պահել էր մինչև 1915 թ.: Վանքի վանապետները սերած էին Տեր-Սարգիս քահանայի թոռներից և դարձել էին 16 ընտանիք: 1898 թ. ի վեր վանքը վանահայր չունեի և կառավարվում էր աշխարհական վանապետների կողմից, որոնք գրեթե սեփականել էին վանքի կալվածները և բաժանել 16 ընտանիքի միջև, որոնք զբաղվում էին երկրագործությամբ, խաշնարածությամբ և մեղվաբուծությամբ, ունեին հարուստ պտղատու ծառեր:

Վանքի պարսպից ներս եղած բնակելի կառույցները անբավարար նկատելով աճող բնակչության կարիքներին, հավաքական աշխատանքով և փոխօգնությամբ պարսպից դուրս կառուցել էին երկհարկանի բնակելի շենքեր, ուր բնակվում էին աճող ու բազմացող ընտանիքից բաժանվող անդամները:

² Քրդերեն՝ հազար=հազար, սէ=հարյուր, բանճաս=հիսուն, տըտե=երկուս:

³ Տե՛ս Մովսես Խորենացի, դիրք Բ, էջ 340:

Վանապետները որևէ տուրք չէին վճարում էջմիածնի և կամ Կարինի ու Երզնկայի առաջնորդարաններին: Նրանց եկամտի գլխավոր աղբյուրը պտղին էր: Տարին մի անգամ ուխտի էր դալիս Դերջանի և Երզնկայի ամբողջ բնակչությունը: Ուխտագնացության օրը խոտքաղին էր, Պենտեկոստեի տոնի օրը: Տևում էր երեք օր:

Վանքը հեռու էր հայաշատ կենտրոններից՝ Երզնկայից ու Դերջանից, ուստի վերջինիս ուխտավորներն ստիպված էին մի օր գիշերելու Դըվնիկ գյուղում, իսկ առաջինին՝ ննձորեկ գյուղում:

Այս վանքը իր դիրքի և վանապետների աշալըջության շնորհիվ շատ մեծ դեր էր կատարում հայ ու քուրդ փոխհարաբերության տեսակետից: Գտնվելով ավելի քան 360 քրդաբնակ գյուղերի կենտրոնում և անմատչելի ապառաժների մեջ, մի տեսակ հանգստակայանի դեր էր կատարում այդ շրջանի գյուղերի բնակչության և կամ հեծվից եկող ու անցնող ճամփորդների համար, որոնց առանց խտրության անվճար սնունդ և պատսպարան էր տրվում, որին նպաստում էին վանապետները:

Վանքը և վանապետների բազմաճյուղյա ընտանիքները կառավարողը Փամպուխ մամն էր: Հարյուր տարեկանի մոտ բարձրահասակ, հուժկու, արագաշարժ և շատ խելացի այս կինը պաակառանք էր ազդում ոչ միայն վանքի բնակիչներին, այլև ուխտավորներին, կրոնավորներին և նույնիսկ քուրդ կրոնապետներին ու աշիրեթապետներին, որոնք նվերներով դալիս էին նրա ձեռքը համբուրելու Փամպուխ մամը թեև անգրագետ էր, բայց ոչ ոք չէր կարող վիճել նրա հետ ազգային, հասարակական, քաղաքական ու կրոնական հարցերի շուրջը:

Վանքը վերանորոգվել է ԺԸ դարում: Ուներ մոտ 30 մետր բարձրությամբ կաղնի փայտից մի ձող: Տարին մի անգամ մեծ հանդիսավորությամբ, եկեղեցական արարողությամբ և պատարագի թափորով, պատարագիչ վարդապետի կամ եպիսկոպոսի առաջնորդությամբ, ձողը դուրս էր հանվում իր թաքստոցից և առաջնորդվում պարսպից դուրս բաց դաշտ՝ ս. Թեադորոսի նահատակված վայրը և այնտեղ կանգնեցվում ուղիղ սյան նման: Զողի գլխին ամրացված էր նահատակի մասունքը պարունակող մի մեծ խաչ: Բոլոր ուխտավորները, առանց սեռի և տարիքի խտրության, հավաքվում էին ձողի շուրջը, տրված ազդանշանով երիտասարդները հերթով փորձում էին մագլցել ձողն ի վեր, հասնել խաչին, համբուրել այն և իջնել: Տարիների ընթացքում քրտնած և թքոտած ձեռքերի

շփումից ձողն այնքան հղկվել էր, որ կարծես ապակեպատված էր, այնպես որ մագլցել փորձող ևրիտասարդներից շատերը հազիվ երկու-երեք մետր բարձրացած, անմիջապես վար էին սահում: Այս արարողությունը կատարվում էր կիրակի առավոտյան պատարագից հետո: Իբր թե վեր բարձրացող և երեք անգամ խաչ-մասունքը համ-բուրող ուխտավորի փափագը կկատարվեր, բայց շատ քչերին էր վիճակվում այդ շնորհին արժա-նանալ:

Ծովի մակերեսից 3190 մետր բարձրություն ունեցող Քեշիշ-տաղի ստորոտում, Բթառիճ գյու-ղից կես ժամ հեռավորության վրա, Բաղնիքի լեռների միացման տեղի սարահարթում էր գտնե-վում զույգ եկեղեցիներով և բարձր պարիսպներով շրջապատված ս. Նիկողոսի վանքը:

Այս վանքն իր բոլոր հարմարություններով ծառայում էր ոչ միայն որպես ուխտատեղի, այլև Երզնկայի ու շրջակաների ամառանոց, ուր օդա-փոխության էին գնում շատ քաղաքացիներ: Իր պատմական և նշանավոր Հորը (արհեստական լիճ, որ ոռոգման էր ծառայում), պողատու ծառե-րի պարտեզները և բնական զմայելի տեսարան-ները այն դասել էին առաջնագույն ամառանոց-ների կարգը:

Ավելացած թթից մեծ քանակությամբ պաս-տեղ, շարոց և անուշ էին պատրաստում:

Վանքի հյուսիս-արևմտյան կողմը գտնվում էին պողատու ծառերի և խաղողի այգիները, իսկ հարավային կողմը՝ բանջարանոցը և կալը: Լիսաղբյուրի նշանավոր պաղ ջրի ակը գտնվում էր վանքի խորանի տակ, որը դուրս էր ժայթքում Բերդար կոչված բարձունքի ստորոտից, ուր գտ-նվում էին տանձի, ծիրանի, խնձորի և ընկույզի ծառաստանները:

Վանքի վարեօրհնողը սակավ էր, ցորենի և գա-րու բերքը հազիվ բավարարում էր վանապետնե-րի ընտանիքների սկսեքերին, սակայն ուներ մեծ արոտատեղեր և ոչխարի հոտեր, կովերի նախիր-ներ ու փեթակներ, որոնք վանապետի սեփակա-նությունն էին:

Վանքի վանապետը Բթառիճ գյուղացի քա-ջակորով Աբոն (Աբրահամ) էր, որը երկար տարի-ներ ի վեր պահում ու պաշտպանում էր վանքի հարստությունները (գրքեր, մասունքներ, ավե-տարաններ, եկեղեցական հարուստ սպասներ), կիրն՝ Գարան նենեն, բոլորի մայրիկն էր, երե-խաների նենեն (հորեղբորկին):

Վանքը կանգուն ու անվթար մնում էր մինչև 1915-ի կոտորածները:

Հաջորդը Երզնկայից հյուսիս-արևելք, Քեշիշ-տաղի հսկա մի գահավեժի գլխին, սարալանջի գոգավոր մի խոռոչից դուրս ցցված և հսկա ժայ-ռերի կատարին թառած արծվաբույնի նմանող ս. Պողոս-Պետրոսի վանքն էր, որն իր բարձր դիր-քով իշխում էր Եկեղյաց գավառին և տեսանելի էր հովտի բոլոր գյուղերից:

Այս վանքը, որ մինչև այսօր կանգուն է մնում, ուներ հրաշալի եկեղեցի և բնակելի շենքեր, բայց իր շրջակա մի շարք հայ գյուղերի՝ Ծիմին (Ծիմ-քին), Փշկըթաղ (Փրկշաթաղ), Գալառիճ (Գալա-ռիս), Քյարթաղ (Քարթաղ) բնակչության թրջա-նալուց հետո ղրկվել էր հասույթի աղբյուրներից, անապահովության պատճառով նաև ուխտավոր-ներից և կորցրել անցյալի փառավոր հմայքը:

Վանապետները վախենում էին անասուններ պահել, թրջացած հայերը մոլեռանդ հայատյաց-ներ էին, այնպես որ շատերը վախենում էին ուխտի գնալ, շենթարկվելու համար ճիմինցիների հալածանքին:

Միառժամանակ վանքը գտնվել էր համբա-վավոր Տատյան ընտանիքի պաշտպանության տակ, որը վերանորոգել էր տաճարը, գավթի մի մասը և նյութապես օգնել այն պահպանող վա-նապետներին, սակայն տիրող անապահովությու-նը և վարեօրհնողի պակասը պատճառ էին եղել, որ վանքը կորցնեք իր գոյության իրավունքը:

Դեպի վանքը տանող ճանապարհը շատ թեք և տաժանելի էր, վերելքը՝ դժվար ու հոգնեցուցիչ:

Սքնգոր լեռան արևմտյան կողմը, Զարտախ-լուի կիրճից դեպի արևելք, 2900 մետր բարձրու-թյուն ունեցող Աղտաղի գագաթից քիչ վար մի լե-ռան լանջին էր գտնվում Միավառ ս. Կառապետի վանքը:

Վանքը պարսպապատ էր, ուներ քարաշեն և-կեղեցի, գավիթ, բնակության սենյակներ, բնա-կան դիրքը՝ շատ գեղեցիկ, օդը՝ զով, ջուրը՝ պաղ, բայց հողագուրկ:

Ավանդաբար պատմվում էր, թե Կեսարիայից ս. Կարապետի մարմինը մի ջորու վրա բեռնած Հայաստան փոխադրելու ժամանակ, ջորին ճամ-փան շեղելով կորչում է: Երկար փնտրելուց հետո ջորուն իր սրբազան բեռով գտնում են պառկած այդ վանքի տեղում, և դա է պատճառը, որ վանք կառուցելու ոչ մի հարմարություն չունեցող ան-տառազուրկ և ամառի այս լեռան վրա եկեղեցի են կառուցել ու վանք հիմնել:

Այս վանքը Տարոնի Գլակա վանքի ժամանակակիցն է և այդ թվականից ի վեր պահում է իր գոյությունը:

Վանքի վանապետները Կարմիր գյուղի Թորոսյան ընտանիքի անդամներն էին ու այն դարձրել էին մի տեսակ սեփականություն:

Երդնկայի արևմտյան կողմը, քաղաքից երեք ու կես ժամ հեռավորության վրա, Սեպուհ (կամ Գոհանամ) լեռան արևելյան բարձունքներից մեկի ստորոտում, Շոխա գյուղից քիչ վեր, գեղատեսիլ լեռնադաշտում էր գտնվում Շախայի ս. Շոդակաթ (Աստվածածին) վանքը:

Այս վանքը օգասուն, չրառատ և դալարագեղ մի լեռնազանգի վրա թառած գիցուհու կերպարն ուներ: Շոխայի ջուրը, որ իր ծագումն առնում էր Քիկսուրի լեռներից, աղվահույզ և փրփրալի անցնում էր վանքի առջևից:

Վանքը պարսպապատ էր, եկեղեցին մեծ և քարաշեն, գավիթը լայն ու լուսավոր, որի աջ և ձախ կողմերում բնակելի սենյակներ կային ուխտավորների կամ օղափոխության եկողների համար: Ուներ ախոռներ, գոմ, մարագներ, լավ վարելահող, առառ ջուր, պարտեզներ, ընդարձակ արոտատեղեր, վանականների հատուկ սենյակներ և ճոխ գրական պահեստ: Ինքնաբավ էր ու հարուստ: Ուխտատեղի լինելուց ավելի ամառանոցային վայր էր:

Ըստ պահված արձանագրությունների, վանքը հիմնվել է Թագե առաքյալի կողմից: Ավելի ուշ մեծն Ներսեսը բարեկարգել և ընդարձակել է, վերածելով այն գիտության օջախի, որը պահել էր իր գոյությունը մինչև 1915 թ.:

Սեպուհ (կամ Գոհանամ) լեռան արևելյան կողմը, գյուղերից հեռու, բնական հազվագյուտ գեղեցիկ մի լեռնահովտի կենտրոնում, բոլոր կողմերից լեռնագագաթներով շրջապատված ու պաշտպանված երկու ձորի միացման տեղում էր գտնվում քարակերտ ս. Հակոբ Մծբնա հայրապետի վանքը: Սրա մանավանդ եկեղեցու և գավթի կառուցվածքը, բնակության հարմար սենյակները մտավոր աշխատանքի համար անգնահատելի մի մենաստանի էին վերածել այն:

Վանքը պարսպապատ, քարաշեն, ամեն հարմարություններով օժտված մի սրբավայր էր: Եկեղեցին իր բարձր դիրքով իշխում էր երկհարկանի քարաշեն ու լուսավոր սենյակներին, դավթին, վանգակատանը և մուտքի մեծ դռանը:

Վանահոր գլխավոր զբաղումը խաշնարածությունն էր, մեղվաբուծությունը և երկրագործու-

թյունը: Ուներ քարաշեն սլահեստի թաքստոցներ, պատմական հարուստ գրականություն և եկեղեցական հույժություններ:

Պատմվում էր, թե վանքը ժամանակին գիտության և գրականության մի օջախ է եղել և թաքստոցը մի շարք վարդապետների ու գիտնական մարգոց: Եթե ոչ իր անցյալի փառքը, գոնե գոյությունը պահել էր մինչև մեր օրերը:

Դարանաղյաց գավառի (Կամախ) հյուսիսային կողմը, Երեք-եղբոր լեռան, Պահարկա-ձորի և Խանտա-ձորի միջև մի բարձունքում էին գտնվում ս. Սերովքե վանքի փլատակները: Սա հիմնված էր Տրդատ թագավորի կողմից և իր ժամանակի ամենամեծ գիտական ուսումնարանն էր համարվել, ուր ուսանել են Հայաստանի ամեն կողմից եկած յոթ հարյուր գիշերօթիկ աշակերտներ:

Վանքի կալվածքների տարածությունը, վարելահողը, անտառածածկ լեռները, արոտավայրերի մեծությունը, ջրի առատությունը և բնական դիրքը հաստատում էին անցյալի բարգավաճության մասին եղած ավանդությունները:

Ուշագրության արժանի էին վանքի քարաշեն եկեղեցին, նրա աջ ու ձախ կողմերում՝ դպրեմանքի սրահների, հավաքական ճաշարահների, գիշերօթիկ աշակերտների ննջասենյակների և մատենադարանի ավերակների ճարտարապետական կառուցվածքները:

Վանքը այդ շրջաններից սկսյալ մինչև ԺԳ դարը պահել էր իր ծաղկյալ վիճակը, ունեցել էր խոշոր եղջերավոր անասունների նախիրներ, ձիերի երամակներ, ոչխարի հոտեր, փեթակներ, գոմեր, մարագներ և ամառանոցներ: Վանքն ինքն է մատակարարել աշակերտության և պաշտոնեության բոլոր պիտույքները, սնունդը, հագուստը: Նա այս շրջանի գիտա-կրթական ամենամեծ օջախն է եղել: Ասվում էր, թե Հովհաննես վարդապետ Երզնկացին (Պլուզ) այս վանքի ուսանողներից է եղել, այս մասին գրավոր վկայություն կար ս. Հակոբ Մծբնա հայրապետի վանքի մատենադարանում:

Ս. Սերովքե և ս. Քերովքե վանքը կոչվելիս է եղել նաև ս. Մինասի անապատ:

Սերովքե և Սեպուհ լեռների միացման տեղը, դեպի Սեպուհ թեքվող աջ կողմի բարձունքի երկու հորերի լեռնահովտում կառուցված է եղել Դարանաղյաց գավառի ամենահին վանքերից մեկը՝ Ավագ վանք անունով:

Շրջակա լեռներն անտառածածկ էին, լեռնահովտը՝ գեղատեսիլ, օդը՝ ղուլ, ջուրն՝ առատ,

ուններ վարելահող և ընդարձակ արոտավայրերու վանքը կառուցված էր Կարմիր քար կոչված հսկա մի սարի ստորոտում, որի սրբատաշ քարերից շինված կաթողիկեն իր երեք խորաններով, հայ հին ճարտարապետության գլուխգործոցներից մեկն էր նկատվում:

Տաճարներից մեկը (խորան) կոչվում էր ս. Աստվածածին, որը, ըստ ավանդության, կառուցված է Թադեոս առաքյալի կողմից: Մյուսը ս. Կարապետի կաթողիկեն էր, որ հիմնված էր Գր. Լուսավորչի կողմից, իսկ երրորդը, ամենամեծը՝ ս. Թադեոսին նվիրված կենտրոնական տաճարն էր, որի մուտքի գուռն եպիսկոպի հաստ տախտակների վրա քանդակված էր Քրիստոսի և նրա աշակերտների խմբանկարը: Կար նաև երկարածիգ և երկարած և երկաթագրերով փորագրված մի հիշատակարան: Այս դուռը եվրոպացիների կողմից որպես հնություն բարձր էր գնահատված և մեծ դուռններ էին առաջարկվել, բայց չէր ծախվել: Եպիսկոպի այս մեծ դուռը իր քանդակներով և արձանագրությունով անվթար էր մնում մինչև մեր օրերը:

Վանքը թեև շրջանի հայության կողմից Ավագ վանք էր կոչվում, բայց ժամանակին անվանված է եղել նաև Կառնի կամ Գառնիի վանք, Լուսավորչի անապատ և Թադեոս առաքյալի կամ սոսկ Առաքելոց վանք:

Ավագ վանքը, որ մինչև 1915 թ. պահել էր իր գոյությունը և ինքնաբավ ու բարգավաճ վիճակ ուներ, այդ շրջանի վանքերից ամենահարուստն էր նկատվում ոչ միայն իր մասունքներով, մագաղաթներով և հնություններով, այլև պատմական մեծ արժեք ներկայացնող իր մի հակինթով: Հակինթը փոքր ձվի չափ, բայց բոլորակ երկնագույն մի քար էր, փայլվում ու լուսաշող, գետեղված մագաղաթապատ եպիսկոպի մի տախտակի կենտրոնում, որը պահվում էր անմատչելի թաքստոցի մեջ, որի մուտքն ու ելքը միայն վանահայրերին և նրանց հաջորդած վանապետներին էր ծանոթ:

Արժեքավոր այս հնությունը պահված տեղից դուրս էր հանվում մեծ արարողությամբ և ցուցադրվում բժշկության եկող ուխտավորներին: Այն իր բուժիչ հատկությամբ Դեղքափ անունն էր ստացել: Մի շարք եվրոպացի հնագետներ առասպելական գումարներ էին առաջարկել այն գնելու համար, բայց ավանդապահ վանահայրերը կամ նրանց ժառանգորդները մեծ երկյուղածությամբ և հավատարմաբար պահում էին այն մինչև մեր օրերը:

Հակինթի աջ ու ձախ կողմերում հոռմեական Կոստանդիանոս կայսեր և կայսրուհու նկարներն էին արված իրենց ստորագրություններով, իսկ երկու նկարների մեջտեղը, ուր մի խոռոչ կար, ասվում էր, թե սուրբ Լուսավորչի ատամն է գետեղված եղել, որը ընկել ու կորսվել է, և կամ վերցված լինելով, խոռոչը պարապ էր մնացել: Ավանդաբար պատմվում էր, թե Տրդատ թագավորը, քրիստոնեությունն ընդունելուց հետո, այցելել է Հոռմի Կոստանդիանոս կայսեր և կայսրն ու կայսրուհին, պատվելու համար քրիստոնյա իրենց եղբայրակցին, իրենց նկարներով և ստորագրությամբ թանկարժեք այս հակինթը նվիրել են հայոց թագավորին:

Ավագ վանքի բնական դիրքն ու գեղեցկությունը, օգն ու ջուրը, կաթողիկենների պատմական կառույցը և վանքի հնադարյան պատմական դուռը դասել են այն այս շրջանի վանքերի ամենահների կարգը և համարել են ամենաավագը¹:

Գառնի գյուղից բավական բարձր (շփոթել Երևանի մոտ գտնվող համանուն գյուղի հետ), Սեպուհ լեռան կենտրոնական գագաթի ստորոտում, Ամենափրկիչ վանքի ավերակների դիմացը, Տրդատս բերդի ավերակներից վերև, բնական շատ գեղեցիկ մի սարահարթում վեհափառորեն կանգուն էր մնում հնադարյան ս. Գրիգոր Լուսավորչի վանքը՝ Մեծ Լուսավորիչ անունով:

Սա ևս մեծ ուխտատեղի էր: Թեև դուրկ հարուստ վարելահողերից, ուներ ընդարձակ արոտավայրեր և անտառներ: Վանքը թեև գտնվում էր Դարանաղյաց գավառի սահմաններում, սակայն վարչականորեն ենթակա էր Երզնկայի առաջնորդարանին:

Վանքն ուներ երկու ջրառատ մեծ աղբյուր՝ Տրդատա բերդի Լիսաղբյուրը և Բարեհամի աղբյուրը, որը, ըստ ներսես Շնորհալու վկայության, Գր. Լուսավորչի հրաշագործությանն էր վերագրվում և ապառաժների ընդերքից էր դուրս ժայթքում:

Տրդատա բերդի ստորոտում, դեպի Գառնի տանող ճամփու վրա, Լիսաղբյուրին շատ մոտիկ կար երկու հավասար մասի բաժանված մի հսկա ապառաժ՝ ուղղահայաց ձևով կանգնած անտառի

¹ 1955 թ. Երևանում հանդիպեցի 1916—1918 թվականներին Հայաստան ներգաղթած երզնկացի Աշխեն Մատենցյանին և Տրդատ ձիկերճյանին, որոնք Ավագ վանքի եկեղեցական մի շարք իրերի բերել ու հանձնել են էջմիածնի թանգարան: Իսկ նշված հակինթը թաղել են վանքի թիկունքին դանդող Կարմիր ժայռի քարայրում և կամ Լիաղբյուրի մոտ, մի գարավոր ծառի խոռոչում:

եղերքին: Ավանդաբար պատմվում էր, թե Տրդատ թաղավորը սրի մի հարվածով երկու մասի է բաժանել այն:

Վանքից դեպի հարավ-արևելք, Սեպուհի երկրորդ գույաթի ապառաժների մեջ ուխտագնացության երկու այր կար, մեկը Հոփսիմե, մյուսը Մարիամ անունով, որոնք այդ երկու կույսի ճղնարաններն են եղել, ուր ճգնել է նաև Գր. Լուսավորիչը¹:

Ինչպես ս. Հակոբ, Ավագ, նույնպես և Գր. Լուսավորչի վանքերի վանահայրությունը մոտավորապես երկու հարյուր տարի, ժառանգաբար մինչև 1915 թ., վարվել էր մի ընտանիքի՝ Փրոխորոնյան տան կողմից և գրեթե դարձել նրա սեփականությունը:

Վանահայրերից հիշվում էին քաջամարտիկ, քաջակորով հսկա Տեր-Հարություն քահանայի անունը և գործերը, որը ապրել է ավելի քան հարյուր տարի, և որի հաջորդն է եղել իր արժանավոր զավակը՝ Տեր-Վրթանես քահանան: Մինչև մեր օրերը վանքի վանահայրն էր Տեր-Վարդան քահանան:

Ղալան-Ղայա լեռան և սուրբ Նղիա դալարագեղ սարի միացման տեղը, Քրդգեղի վերևը, բնակուն շատ ղեղեցիկ մի վայրում էր կառուցված անցվորիկ (ուշաթափվող) երեխաների ամենակարող բուժիչ սուրբը՝ ս. Կիրակոսի վանքը: Սա վարելահող շուներ, բայց ուներ լավ արոտավայրեր, ջուր, դուլուլ օդ ու կարողացել էր գոյությունը պահել մինչև 1915 թ.:

Եկեղեցին քարաշեն էր, ուներ բնակության հարմար սենյակներ, պարսպից ներս՝ մի մեծ սայվանտ (այվան), ուր ուխտավորներն էին պատսպարվում, իսկ բնակելի սենյակները վարձու էին տալիս օգափոխության եկողներին:

Վանքն ուներ ձեռագրերի և զանազան մագաղաթների հարուստ պաշար, որոնց մեջ ամենաարժեքավորը հինգերորդ դարի մագաղաթն է «Այսմավորքն» էր, ուր արձանագրված էին ոչ թե եկեղեցական աղոթքներ, այլ ժամանակի դեմքերն ու դեպքերը, կատարված շինությունները, պատերազմները և տեղափոխությունները: Դա մի տեսակ պաշտոնաթերթ էր և կամ լրատու էր: Դժբախտաբար այդ արժեքավոր ձեռագիրը 1901 թ. գողացվել էր վանքի հոգաբարձու տխրահուշակ Հովհաննես Թաթիկյանի կողմից և Այնթապում 300

ոսկով ծախվել մի եվրոպացու, որն էլ հանձնել էր Լոնդոնի թանգարանին:

Սուրբ Նղիա լեռան դեպի վանքը նայող ժայռերի մեջ մի այր էր փորված, որը Մատուռիկ էր կոչվում և իր անառիկ դիրքի շնորհիվ հեթանոսությունից քրիստոնեությանն անցնելու շրջանում որպես թաքստոց էր ծառայել մի շարք մտավորականների, որը վկայող արձանագրությունները պահված էին վանքի մատենադարանում:

Մեծուր լեռան արևմտյան սարալանջին, Ղաղան-Ղայայի արևելյան կողմը, գյուղից վերև ընկած դալարագեղ մի լեռնադաշտում Տրդատ թաղավորի կողմից կառուցվել էր Տիրսուշեն վանքը, որը մեծն ներսեսի աճյունը այդտեղ փոխադրվելուց հետո վերանվանվել էր ս. ներսես Հայրապետի վանք:

Վանքը շրջապատված էր բերդի ձևով և ինքնապաշտպանության բոլոր հարմարություններով: Վանքի գլխավոր կաթողիկեն իր հարակից գմբեթավոր եկեղեցիներով կառուցված էր մոխրագույն սրբատաշ քարերով, կաթողիկեի գլխավոր տաճարն առանձնացված էր մյուս եկեղեցիներից, աջ կողմը շինված էր մի մեծ ավանդատուն՝ Տոճարիկ անունով (սրանից Տաճարակ գյուղն ստացել էր իր անունը), իր խորանով և մկրտության ավազանով:

Խորանի ետևը, անտեսանելի մի տեղ, շատ մեծ ճարտարությամբ ղետեղված էր ստորերկրյա մի թաքստոցի դուռը, որը քարակերտ սանդուղքներով իջնում էր ժայռերի մեջ փորված և ամեն կողմից պաշտպանված այն քարանձավը, ուր պահվում էին վանքի հարստությունները (մագաղաթներ, գրչագիր մատյաններ, ոսկե խաչեր, եկեղեցական թանկարժեք սպասներ և մասունքներ):

Մայր տաճարի, երկու կաթողիկեների և ավանդատան բոլոր դռները կիպարիսի փայտից շինված ու քանդակազարդ էին: Մանավանդ կենտրոնական մեծ դուռն իր արձանագրություններով և գեղակերտ նկարներով գերազանցում էր բոլորին: Այն անվթար էր մնում մինչև մեր օրերը: Կենտրոնական խորանի մեջտեղը ղետեղված էր մեծն ներսեսի յուզաներկ մեծ անդրին, իսկ խորանի աջ կողմի պատի մեջ ղետեղված մեծ և երկար մի քարի վրա կար մի անընթեռնելի արձանագրություն: Այս բոլորից ամենաարժեքավորը ներսես Ծնորհալու դամբարանն էր, որը գտնվում էր կաթողիկեի տաճարի խորքում: Գեղակերտ տասլուրիսքարի վրա արձանադրված էր հայրապետի աճյունները Թիլ ավանից Տիրաշեն փոխա-

¹ Տե՛ս Մովսես Խորենացի, դիրք Բ, էջ 242—244:

պրվելու և այս տաճարի մեջ թաղվելու, Տիրաշեն անունը ներսես հայրապետի վերափոխվելու մանրամասն պատմությունը: Տապանքարի արձանագրության ձեռագիր բնագրից մի-մի օրինակ 1880 թ. Երզնկայի առաջնորդ Դիմաքսյան եպիսկոպոսի կողմից ուղարկվել են Պոլսո պատրիարարան և էջմիածնի Գևորգ Դ կաթողիկոսին:

Վանքը իր բոլոր հարմարություններով, ճարտարապետական կառույցներով, մշակելի հողերի, արոտավայրերի, այգիների և պտղատու ծառերի հարստությամբ աչքառու տեղ էր գրավում համայնման հաստատությունների կարգին և պահպանում էր անցյալի փառքի ու վեհության շունչն ու դրոշմը:

Անցյալ գարի ութսունական թվականներին Երզնկայի առաջնորդ Հմ. Դիմաքսյան եպիսկոպոսի ջանքերով և Պոլսո մեջ կազմված «Միացյալ ընկերության» նյութական օժանդակությամբ կառուցվեց մի նոր դպրոցի շենք: Դա որքանոցի անվան տակ մի մեծ ուսումնարան էր, ուներ 30—40 աշակերտի համար ննջարան, ճաշարան, դասարան և պարապմունքի սրահ: Նպատակն էր՝ հեռու ընդհանուր աղմուկից և տեսողությունից, դաստիարակել գիտելիքներով օժտված մի սերունդ:

Այս ուսումնարանն ընդունվում էին բացառաբար քրդական շրջանների հայկական նախակրթարանների մեջ ուսած և աչքի ընկնող աշակերտները, որոնք պարտավոր էին քրդերեն խոսել իմանալ: Հակառակ սովորած Համիդի վարած հայահալած քաղաքականության և այս շրջաններում բարձրագույն կրթության արգելքներին, այստեղ պատրաստում էին հայ և քուրդ ժողովրդական գործիչներ, որոնք պիտի պաշտոնավարեին բերդարնակ շրջաններում «Միացյալ ընկերության» կողմից բացված վարժարաններում: Ուսումը ձրի էր, ուսման շրջանը՝ երեք տարի: Շրջանավարտը թե՛ ուսուցիչ և թե՛ զինվորական էր, նույնպես և ազգային գործիչ:

Սակայն հազիվ էին առաջին շրջանավարտները տեղավորվել Խնձորեկի, Քղիի, Հերտիֆի և Մեղիքանի նորակառույց դպրոցներում, ուր սովորում էին հայ ու քուրդ աշակերտներ, թուրք կառավարությունը փակել տվեց ուսումնարանը և ձերբակալեց տնօրենին: Մի քանի տարի հետո կրակի տրվեցին նաև վերը հիշված շրջանների «Միացյալ ընկերության» վարժարանները: Սակայն այդ կարճ ժամանակաշրջանն իսկ բավական եղավ, որ այդ դպրոցների մեջ ուսած հայ և քուրդ աշա-

կերտները կարենային հայերեն տառերով գրել ու կարդալ քրդերեն, նույնպես և քրդերը ծանոթանան հայոց լեզվին ու պատմությանը և խոսեն ու գրեն հայերեն:

Կյունցիք և Երկան գյուղերից վեր, Մեռճան լեռան հյուսիսային սարալանջին և Մնձուրից հոսող ջրառատ գետակի ափին, մի բարձունքի վրա կառուցված էր պարսպապատ և բերդանման ս. Դև-վոզի վանքը:

Վանքի եկեղեցին քարակրից էր շինված, մի տեսակ ամրոցի տպավորություն ուներ: Դրա աջ ու ձախ կողմերում կառուցված էին բնակության հարմար սենյակներ, հանրակացարան և գավիթ: Բակում կային շատրվան-ավազան և գոմեր, ախոռներ ու մարագներ: Վարելահողի պակասը վանապետներին հարկադրել էր պարապելու առավելապես անասնապահությամբ, որովհետև վանքն ուներ լեռնային լավագույն արոտավայրեր և անտառածածկ բարձունքներ:

Այստեղ չկար մյուս վանքերի բեղմնավոր կյանքն ու գործունեությունը, վանքը զուրկ էր նույնիսկ անցյալի հնություններից, շունք աչքի ընկնող որևէ ձեռագիր և կամ մատյան:

Ս. Գևորգը պղնձագործության պաշտպան և հովանավոր սուրբ էր համարվում, գտնվում էր պղնձագործ արհեստավորների անմիջական հոգատարության տակ: Վանքը կանգուն էր մինչև 1915 թ.:

Մեռճան լեռան ստորոտում, Մեռճանի գետի աջ բազուկի եզերքին, Ուռեկ, Բլուր և Գոմգոր գյուղերի մեջտեղի լայնածավալ մի լեռնահովտում էր հիմնված Չարչառանաց լուսավորիչ կամ Տառապի վանքը: Դերսիմի քրդերը Զիաբե լուսավորիչ և կամ Զիարե Մեռճան էին անվանում այն:

Վանքը պարսպապատ էր, եկեղեցին և գավիթը գտնվում էին հարավային կողմը, իսկ բնակության շենքերը, լուսավոր և օգասուն սենյակները, մեծ ճաշարանը, խոհանոցը, մառանը և պարապմունքի դահլիճը՝ արևելյան կողմը: Բակի արևմտյան մասը հատկացված էր ախոռի գոմին, մարագին և մեղվանոցին: Բակի կենտրոնում գտնվում էր ջրառատ աղբյուրը՝ մեծ ավազանով և մանավանդ ճեմելավայրով: Հյուսիսային կողմի պարսպի երկու ծայրի վրա կառուցված էր երկու մեծ և բարձր աշտարակ, որոնք որպես դիտարան-ամրոցներ ծառայում էին վանքի ինքնապաշտպանությանը:

Ուներ հարուստ վարելահող, խաղողի մեծ այգիներ, պտղատու ծառերի պարտեզներ և արոտատեղեր: Հարուստ էր նաև հնություններով, կենտ-

յունական խորանին կից կառուցված էր ստորերկրյա մի թաքստոց, ուր պահվում էր Լուսավորչի արծաթե ոսկեզօծ աջը, որի մեջ զետեղված էր սրբի մասունքը: Կային նաև շատ սպասներ, մազաղաթե մատյաններ, ձեռագիր ավետարաններ և երկաթե փոքրիկ տատասկներ (մեխեր), որոնց վրա, ըստ Ագաթանգեղոսի վկայության, չարչա-

րել էին Գր. Լուսավորչին, ուստի այստեղ էլ կառուցել էին Տատասկի վանքը՝ Չարչարանաց լուսավորիչ անունով:

Ավանդաբար պատմվում էր, թե այս վանքերի մի մասը կործանվել է Զալալիների արշավանքի ժամանակ (1604—1606), ապա կրկին վերսշինվել: